



NE TYOTYERENHTONH

KAHYATONHSERA

N E P A U L

NE ROYATADOGENHTI SHAGOHYATONNI

JINONKA NE

CORINTHIANS,

WILLIAM HESS,

TEHAWEANATENNYON ONI SHOGWATAGWEN NE

J. A. WILKES, Jr.

NEW-YORK :

PUBLISHED BY HOWE & BATES,
FOR THE YOUNG MEN'S BIBLE SOCIETY OF NEW-YORK,

AUXILIARY TO THE
BIBLE SOCIETY OF THE METHODIST EPISCOPAL CHURCH.

1836.

1763

g. L. L. L.

THE EPISTLE
OF
PAUL THE APOSTLE
TO THE
CORINTHIANS,
TRANSLATED INTO THE MOHAWK LANGUAGE,
BY WILLIAM HESS,
WITH CORRECTIONS BY
J. A. WILKES, Jr.

NEW-YORK:

PUBLISHED BY HOWE & BATES,
FOR THE YOUNG MEN'S BIBLE SOCIETY OF NEW-YORK
AUXILIARY TO THE
BIBLE SOCIETY OF THE METHODIST EPISCOPAL CHURCH.

1836.

NE TYUTYADONGHSERATYERENGHDONH

NE PAUL ROYADADOKENGHDY

YEGHSHAKOGHYADONNYH NE JINONKA NE

CORINTHIANS.



CHAPTER I.

Oghnakenkeh nenshadehhodennonghweronghkwenthonh neony shihhodonrenh, waghshakoghrejaron ne skanikonrat kenhak.

PAUL, ne ronwayadarakwenh ne ro-nhaonh ne Yesus Keristus ne aoriwa jieghnitho-nikonghrodenh ne Niyoh, ony ne *Sosthenes* onwadadekenhah,

2 Ji-nonka ne raotyughkwadokenghdikeh ne Niyoh ne ne eghradideron *Corinth*, ne ne ro-nonhha ne shonwadiyadade-righstonh Keristus-tserakonh Yesus, ne shonwadinadonghkwenh rodiyadadokenghdy, thondakakwekde ji ok nonweh jiwadonghwenjade ronwaronhyenhare ne raoghsenna ne Yesus Keristus Eghjhidewayaner, thadejaronh shadeyonkwa-wenh:

3 Kendenron wayon nisekeh, ony kayanerenh, dakayenghdaghkwe Niyoh-neh Eghjhidewanihhah, neony dakayenghdaghkwe Royaner-neh Yesus Keristus.

4 Dehhinonghweradonghs Ake-Niyoh tyutkonh ne ne ise sewayadake-nhaghtsera, akarihohony ne raodenrat ne Niyoh, ne ne ji-nahhoden tyetshiyawih ne Yesus Keristus;

5 Ne ne orighwakwekonh wahhy ne sewatshokowaghtsera ne raonhhakeh, yekakwekonh ne jisewadadighs, nokhony ne Kanikonghrowanenghtsera yekakwekonh;

6 Shadeyught ony jirorighwaghni-ratstaghkwenh ne Keristus orighwiyu wahhy odokenhonh roweyennendaonh nise-tserakonh;

7 Etho kady yalhogh-naken thaesonnyade ne ji-nahhoden yondadawyh; sewanonghne ne ji-nadentre ne Eghjhidewayaner Yesus Keristus:

8 Ongyka kady ony shaden-yawenne enjesayadaghnirade ne ne jiyeyuderihhokde, ne ne aontyesen aonsesaderighwagh-rako ne raodeghniserakonh ne Eghjhidewayaner Yesus Keristus.

9 Niyoh naah thorighwayery, raonhhakeh yeghjhise-wa-ronghyenhharonh ne ne ji-nonka ne skariwat skanikonrat aese-wade ne ne Royenhah Yesus Keristus Eghjhidewayaner.

10 ¶ Ne nonwa Wakwennidenghden, dewadadekenhah, ne raoghsennakonh ne Eghjhidewayaner Yesus Keristus, ne ne sewakwekonh ok ne shakat skariwat ensewadatyade, nok-hony yaghtaesewennikonghroghwihha ne sewentyughkwakonh; ok daghnon kaweyennendaonhhak yadesewatyeghston-hhak skanikonrat kenhhak nokhony ok ne shakat kenhhak ne sewayadoreghdaghxhera.

11 Ikenh nense karihhowanaghdennyh ne isekeh, dewa-dadekenhah, agaonha yonkhrori ne ne eghradideron ne jirononghsode ne *Chloe*, ne ne deyuriwadeh deyerighwake-nhaghs ne sewentyughkwakonh.

12 Nonwa ne ne kenhenh *Kadon*, Ne ne ji-niyadejonh sewadonghs, I-ih-neh ne *Paul*; ony I-ih-neh ne *Apollos*, nokhony I-ih-neh ne *Cephas*; neony I-ih-neh ne Keristus.

13 Dehhodennikonghrakhaghsyonkwenh kenh ne Keristus? dehhonwayendanhare kenh ne *Paul* ne ne ise aese-wa-rihhonnike? nedenhens neeh kenh sewatnekoseraghdonh ne raoghsenna ne *Paul*?

14 Wahhiyadonren ne Niyoh ne ne yalhonghka Dekheghnekoserhonh ne ji-nijonh, ne ok ne *Crispus* nok *Gaius*:

15 Onwaneken kaneka en-yondonhheke ne wakatnekoseraghdonh nakwah iih axhennakonh.

16 Neony I-ih kheghnekoserhonh ne rao-nonghsakonh raoghwajira ne *Stephanus*; yadeskadeshon, Yaghdewakader-yendare kaneka oya aakheghnekoserhon,

17 Ikenh ne Keristus yaghdethake-nhaonh ne nakhegh-nekoseraghwe, ok tenhnon nenkaderighwaghnodon norighwadokenghdy; yah ne tegatstha ne kanikonghrowanenghtsera nowennaokon, onwa neken ne jidehhonwayaghsonde ne Keristus yaghkariwa thenwadonghsere.

18 Ikenh ne ronwanaderighwaghnodonse ne ro-nonhhakeh ne jidekayaghsonde ne ro-naghdonnyh, ronneghre kende-gghsera; nok nonkyonhhakeh ne jonkwayadakwenh, ne wahhy ne raoshatstenghsera ne Niyoh.

19 Ikenh kaghyadon naah, Enkaghdonde ne raodinikonghrowanenghtsera ne rontdokhase, nokhony yahhothe-non thiyadaonsayurihhondane neghniwatdokhatserodenh yakoda-derihhonnyennyh.

20 Ka-neh rontdokhase? Ka-neh shakodighyadonny? ka-neh dehhodiriwadeh nekenh yonghwenjade? yaghkenh Niyoh kende-gghsera dehhaonnyadonh ne kanikonghrowanenghtsera nekenh yonghwenjade?

21 Ikenh ne oghnakenkeh, ne rao-nikonghrowanenghtserakonh ne Niyoh, ne ne kanikonghrowanenghtsera ne jiyonghwenjade ne nyaghdehhonwayenderighne ne Niyoh, thaweryendiyughs ne Niyoh ne ji-nikende-gghserodenh ne jiyonderighwaghnodon ne ne naonsahhodi-yadako naondahhonneghdaghkwe.

22 Ikenh ne *Jews*-aka radirighwisax ne wade-nyendenghstonh, neony ne *Greeks*-aka ronnesax ne kanikonghrowanenghtsera:

23 Nok yakwaderighwaghnodon ne Keristus jidehhonwayendanhare, ne *Jews*-akakeh ne tho-naghdeekon ne jikakonghretshakeron, nok ne ro-nonhhakeh ne *Greeks*-aka thiyehhodirighwaraonh;

24 Nok ro-nonhhakeh ne ne ronwadinadonghkwenh, yekakwekdonh ne *Jews*-aka nokhony ne *Greeks*-aka, Keristus ne raoshatstenghsera ne Niyoh, neony rao-nikonghrowanenghtsera ne Niyoh.

25 Asekenh ne raodeghsera ne Niyoh shakotdokhatserakennyonh ne onkwehhokon; neony ne jiyukenhheyonh ne Niyoh senlha ne kashatste ji-niyugt nonkwehhokon.

26 Ikenh desewakanere jiniyoht jiyetshironhyenharonh, dewadadekenhah, oghniyutyerenh yaghdeyudonkwedakade nayako-nikonghrowanen, konwaghsera ne owaronh, yaghdeyutkade nayuneghrakwaghdon nakoshatstenghsera, yaghdeyutkade ne yonkwedanoron, ne ayondade-nadonghkwe:

27 Niyoh rorakwenh ne thiyurighwendese ne jiyonghwenjade ne ne daodinikonryake daodinikonrharen ne rodinikonghrowanenghse: nokhony Niyoh rorakwenh ne yurighwakenhheyonh ne jiyonghwenjade ne ne dakanikonrharen jiyuneghrakwaghde-nyon kashatstenghsera;

28 Neony ne ne yurighwendenghde-nyon ne jiyonghwenjade, neony ne karighwaokon ne ji-nahhoden nyudaghkwaswat, Niyoh rorakwenh, etho orighwiyu, neony ne karighwaokon ne ne yaghnedekenh, ne ne enkakweny nyahhothe-non thiyadayurihhondane, ne karighwaokon nethoh;

29 Ne neh yahhoghthaowaghroden thayakaonwesaghde ne jidehhakanere.

30 Nok ne ne raonhhakeh seawayendaghkwen ne Keristustserakonh Yesus, raonhha wahhy ne Niyoh shonkwagh-senhennyh nonkyonhhakeh ne kanikonghrowanenghtsera, nokhony natdakwarighsyonghtsera, ony enseghshakoyadado-kenghdighste, nokhony seghshonkwaghnerenghsyonh;

31 Wahhy ne entyuyanenhawe ase eghniyught jikagh-yadon, Raonhha ne ne enghronwesaghde, kinyoh raonwesaght ne Royanertseragonh.

CHAP. II.

Paul *wahharihhowanaghde ne raoderighwaghnodonghtsera, ne raoshatstenghsera ne Niyoh.*

NEONY I-ih, dewadadekenhah, ne o-nenh shakewe ne ise-keh, yaghdewakewennaneghrakwaghdonhhatye ne jiwa-kewe, nedenhens ne kanikonghrowanenghtsera, kwarihhowanaghdeny ne isekeh ne ne Niyoh rakerighwaghniradyh ne ne tokenghskeonweh.

2 Ikenh Dewakennikonrakonde ne ne yahhoghthaorihhoden thenwakaderyendarake ne sewentyughkwakonh agwah ne ok neh Yesus Keristus ony raonhha dehhonwayendanhare.

3 Neony I-ih shidewese ne jiyukenhheyonh, nokhony ne kaghderonghxherakonh, ony eso yuyadishonghk.

4 Neony nakwadatyatsera nokhony nakwaderighwaghno-donghtsera yah ehtewagyeren naonkewennaweyenston ne akerihhoryaneron ne onkweh ako-nikonghrowanenghtsera, ok daghnon adokenhonh thaonderighwakwatho ne Kanikonra, nokhony ne kashatstenghsera;

5 Ne ne jidiseweghdaghkonh yahheghthakadane ji-nonweh ne onkwehhokon ako-nikonghrowanenghtsera, ok daghnon ne raoshatstenhsera ne Niyoh.

6 Ethosane ne wakwadatyade ne kanikonghrowanenghtsera ne raodityughkwakonh ne ne yakodadeweyennendaonh: shekonh yaghden ne kanikonghrowanenghtsera ne ne ken-ikenh yonghwenjade, yaghden ony ne yeyadanoronshon ne ne ken-ikenh yonghwenjade, ne nenne-eh nenwaghdon;

7 Nok nonkyonhha ne wakwadatyade ne rao-nikonghrowanenghtsera ne Niyoh ji-nonweh ne yaghdeyokent, shade-yught ony ne jiwaghseghdonh ne kanikonghrowanenghtsera, ne ne ji-nahhoden ne Niyoh rorighwison rorihhowanaghdonh arekho shiyonghwenjade ne iih onkyonwesenghtsera;

8 Ne ne ji-nahhoden ne nyaghkaneka ne yeyadanoronshon ne kenghyonghwenjade nao-naderyendarake; asekenh naonaderyendarake, yaghkina thao-neron degshakwayendan-harenh ne Royaner ne onwesenghtsera.

9 Nok, eghse-niyught jikaghyadon, Yagnokara deyudikenh, yaghden ony nohhonghda deyunaghronkenh, yakhony thayakotyenny nakaweryaghsakonh nonkweh, ne ji-nakarihhodenshon ne Niyoh shakoghseronnyaghkwenthowyh ne ne ronwanoronghk'wa.

10 Nok Niyoh shongwatogateanih shongwanhotongweanih wahonni ne rao-nikonra: ikenh ne na ne Kanikonra ne orighwakwekonh ne denwaghkwakayonde, etho orighwiyu, ne yurighwaghnodes ne Niyoh-neh.

11 Ikenh onghka ne onkweh yakoderyendare ne ji-nika-rihhodense ne onkweghneh, ne ok neh ne kanikonra ne onkweh iwat nakaonhhatserakonh? eghkady niyught ony, ne karighwaokon ne Niyoh-neh yiahhonghka ne onkweh deyakoderyendare, ne ok ne Niyoh Rao-nikonghradokenghdy.

12 Onenh wahhy yonkwaye-nah, yaghnedekenh ne kanikonra ne onkwehhokonkeh, ok daghnon ne ne Kanikonra ne Niyoh-neh; ne ne aontyesen ayonkwaderyendarane ne karighwaokon ne ne skennen thighshonkwawyh ne Niyoh.

13 Ne ne ji-nahhodenshon yonkwaghthare, yaghden ne dekenh ne onkweh akowennaokon akotdokhatsera ne ayonkwarihhonnyen, ok kenkayen ne Kanikonghriyughstonh en-yonkwarihhonnyen; en-yako-nikonghrisake o-nikonghroskon ne karighwaokon ne yenke-neghde no-nikonghroskon.

14 Nok ne jiakwah niyakonnhodenh ne onkweh yaghne thayeye-na ne ji-nahhodenshon ne Rao-nikonra ne Niyoh: ikenh ok thiyorihwenteh ne raonhageh: yiahhony deyaweght aharihwayenterhane aoriwa ne kanigonragonh ji yegenhs.

15 Nok raonhha ranikonghrakwe-niyukeh dehhayadoreghtha orighwakwekonh, nok shekonh ne yadehhayadyh yiahhonghka thadaonwayadoreghde.

16 Ikenh onghka na yakodokenghseh ne rao-nonghdonnyonghtsera ne Royaner, ne naondon aorihhonnyen? Nok ne onkyonhha yonkwayen ne rao-nonghdonnyonghtsera ne Keristus.

CHAP. III.

Ononda naah yuyanerenghjianh ne exhaokon.

NEONY n'I-ih, dewadadekenhah, yaghdewakkwe-nyonh nakwawennaraonh ne isekeh jiniyoht ne ahesewanigonhragweniyohake, ok ji-niyught ne aesewarighwaneraaxkon, shaden-yawenne ji-niyught nowirasa ne Keristustserakonh.

2 Ononda wahhy kwanondenh, nok yaghden nenne nowaronh: ikenh jiniyore nonwa yaghdesewarharats naese-nikweny, yiahhony nonwa shekonh arekho desewakwe-nyonh.

3 Ikenh shekonh wahhy sewarighwaneraaxherare: ikenh kenwahhy niyught karonnyon ne sewentyughkwakonh ne yako-noshenh yakaweronskonh, nokhony tyakorighwareh, nokhony sewennikonghroghwihhon, yaghkenh desewarighwaneraaxherare, nokhony desewadekhahhaghkwenhhatye ji-niyught ne onkwehhokon?

4 Ikenh ji-nenwe akare en-yairon enskat, I-ihneh ne *Paul*; nokhare thiskade enjairon I-ihneh ne *Apollos*; yaghkenh ne thaese-nidaxhade?

5 ¶ Onghka kady naah ne *Paul*, onghka ony ne *Apollos*, ne wahhy ne nijihhenghstajyh ro-nonhhakeh wahhy nondawe jidiseweghdaghkonh, shaden-yawenne ne Royaner ne shakowyh ji-niyadeyakonh?

6 I-ih wakyenthonh; *Apollos* wahhaghnekanondenghseke wahhoghnekontyeseke; nok Niyoh shakowyh jienwadeghyaron.

7 Etho kady yaghden ony naah raonhha ne ne aoyenthon othe-non, yaghden ony ne raonhha ne ne raghnekanondenghs roghnekontyese; ok Niyoh shakowyh ne en-yondeghyaron.

8 Nonwa raonhha ne ne royenthonh nokhony raonhha ne ne raghnekanondenghs roghnekontyese enskat naah: neony niyadeyakonh t'kakonde en-yeye-na naah ne ne yadeyeyadyh en-yakotyeritshe, ne entyuyanenhawe ne yadeyeyadyh ako-yudenghsera.

9 Ikenh ne wahhy shaonkwayudenghserat ne Niyoh: jonhha wahhy ne Niyoh eghjhisewayenthowy; jonhha wahhy ne Niyoh eghjhisewanonghsaketskwenny.

10 Ne entyuyanenhawe ji-nonka ne raodenrat ne Niyoh ne ji-nahboden yonkwawyh niih-neh, ji-niyught ne ratdokha ro-nonghsaketskwenh ne tho-nonghdonhhonh, I-ih dewake-nonghsakensere, nok shekonh oya thikade wathanonghsaseren. Nok kiasa ji-niyadeyonkwedakeh radennikonrarenh ji-nenhhayere jienhadenonghsonny jidenhhayaseren.

11 Asekenh noya thikade aondaye-nonghsakenseraaghkwe yahhonghka thayekweny daondaye-nonghsakenseren ne neh nentkanonghsakensere, neneane-eh ne *Yesus Keristus*.

12 Nonwa, doka onghka ok ne onkweh ehhadennonghsonny ne ken-ikenh aondahhanonghsakenseraaghkwe, ojinekwar, nedenhens ne kenrakenh karistanoron, nedenhens ne kanenyanoronshon, oyende, ohhonde, oji-naaghrashonhah;

13 Niyadeyonkwedakeh nakoyudenghsera thenwatkwa-tho: enweghniseradeke t'kakonde thenwaderighwakwathoghs-eron, asekenh wahhy t'kakonde ojire enwadennhodonko; neony ne ojire t'kakonde en-yakode-nyenden ne niyadeyonkwedakeh nakoyudenghsera ne oghnahhoden enkenhhake.

14 Doka onghka ne raoyudenghsera engayendake ewade-rihohetste ne ne ehhenhhadennonghsaren, t'kakonde enhha-ye-na ennhotyeritshe:

15 Doka onghka ne raoyudenghsera enwatshaaghdon, t'kakonde enhhatkaronny enhharonghyaken: nok nyadehha-yadyh t'kakonde denhhadonkoghde, shekonh ji-niyught ne ne ojire.

16 ¶ Yaghkenh desewaderyendare jonhha wahhy ne rao-nonghsadokenghdy ne Niyoh, neony ne eh ne Kanikonra ne Niyoh satyennyh nise-tserakonh?

17 Doka onghka ok ne onkwew en-yehhetkenghde ne Niyoh rao-nonghsadokenghdy, raonhha ne Niyoh t'kakonde engshakoghdonde; ikenh ne rao-nonghsadokenghdy ne Niyoh ne na aoskon norighwadokenghdy, ne ne eghsewaya-dareghkonh o-nonghsadokenghdikeh.

18 Kinyoh toghsa onghka ne onkwew radade-nikonrha-denh; Toka kaneka ne onkwew ne sewentyughkwakonh aagh-rerheke katdokha nekenh jiyonghwenjade, kinyoh rodeh-hak ji-nihhayadodenhak, ne nondakarihonny aondon ao-ni-konghrowanha.

19 Asekenh ne kanikonghrowanenghtsera ne kenthoh ji-yonghwenjade ne na ne kendegehserowanenh ne Niyoh-neh: ikenh eghse niyught jikaghyadon, Raonhha shagodiyenahatye ne rodinigonhrowanenhse ne ne ro-nonhha raodirenkenny-eghtseragon.

20 Nokhare, Ne Royaner roderyendare ji-nihho-nennongh-donnyonghtserodense ne rodinikonghrowanenghse, ne ne yah-hothe-non dehhodirihhonde naondonghradaghkwe.

21 Ne kady wahhonny toghsa onghka ne onkwew aonwa-nendon ne onkwehhokonkeh: ikenh orighwakwekonh sewa-wenghk.

22 Aden *Paul*, nendenhens *Apollos*, doka ony *Cephas*, doka ony jiyonghwenjade, doka dens ne ne yonnhe, doka ony kenhheyon, doka denhens ne ne ji-nikarihhdense nonghwa-keh, ne denhens ne karighwaokon dawé, akwekonh ise sewa-wenghk;

23 Nokhony jonhha na raowenghk ne Keristus; nokhony ne Keristus na raowenghk ne Niyoh.

CHAP. IV.

Ne ne ji-nakhoden dayeyadoreghthake ne ji-nikhadiyadodense ne radijihhenghstajyh.

KINYOYH ne ronkweh etho denghshonkwayadoreghthake, ji-niyught ne raojihhenghsta ne Keristus, neony ne ronwatsteristase ne ne okthenhhdikwatho jiyudaghseghdanyon ne Niyoh-neh.

2 Nokhony, akwah na ronwadihhonkaryakonh jiro-nats-teristonh, ne ne ronkweh yudetshenryonh thaweghdaghkonh.

3 Nok ne iih akwah wahhy kenniyurighwaah ne ne Da-aghskwayadoreghde nise, doka ony onkweh akoyadoregh-daghxhera; etho orighwiyu, yaghtaakkweny ne I-ih daka-datyadoreghde.

4 Ikenh yahhothe-non Dekyenderyh ne yadekyadyh; shekonh sane yahne thaontkweni ne okthagadohetste: nok raonhha na denhhakyadoreghde ne Royaner.

5 Ne kady wahhonny toghsa othe-non dejadoreght arekho thiyeyuderighwihheh nyareghkwe ne Royaner enrawe, raonhha dejaronh enhhahhewe nenharighodaghsy ne jiyuderighwaghseghdanyon ne jityukaraghs, neony t'kakonde then-waderighwakwatho ne jikonwadirihtonnyennyh ne adon-nhetshokon; neony ethone nent'kakonde niyadeyонkwedakeh en-yakoyendane ne adonghraghtsera ne Niyoh-neh.

6 Neony ne ken-ikenh karighwaokon, dewadadekenhah, I-ih wahhy wakyanaonh dekwaderaghdennyh ne ji-nonka ne I-ih neony ne ji-nonka ne *Apollos* ne ne ise sewarihhonnyat; ne akarihhonny aeseaweyendeghdane nonkyonhhatserakonh toghsa onkwehhokonkeh ok aesewennonghdohny-onhheke senhha e-nekenh ji-niyught ne jikaghyadon, ne ne yahrenskat ne ji-nijonh ne ne daesewanakhewaraseke ne wahhetken daesewadadenghnihheke.

7 Ikenh onghka yetshighsaanyh ne daesewaderighwadih-hanyon? neony nahhoden nonwa sayen ne ne yaghdeseayenah? nonwa, doka aesaye-nake, oghnaah akarihhonny aaghtshonwesaghdde, ji-niyught ne doka yaghtaeseaye-nake?

8 Nonwa ne jonhha wesewatyeritshe sesewade-nantshe, nonwa wahhy jisewatshokowah, eghnisewayadanoronse ji-niyught nekoraghkowatshon ne yaghlonkyonhha deyakwayadade; neony ayawen ne Niyoh-neh aaghjhisewayadanoronghste, ne ne onkyonhha ony shadayawenne enskatneh jiaaghshonkwayadanoronghkwe.

9 Ikenh Ikeghre ne na ne Niyoh degshonkwanhaonh ne onkwayadadokenghdy ne oghnakenkeh, ji-niyught jikadokenghjion jiwaghjade ne kenhheyon; ne yonkhiyadonnyadonh ne deyonkwatkaghrondaghkwenh ne jiyonghwenjade, neony nekondironghyakeghro-nonkeh, ony onkwehhokonkeh.

10 Yonkwendeh wahhy ne Keristus raorihhonnyat, nok wahhy sewatdokha ne Keristustserakonh; yonkwayadanetskhah, nok ne jonhha wahhy sewashatste; wahhy sewatkonnyenghskowah, nok ongyonha yonkhikenghronnyane enyonkhiyadaghkweghswen.

11 Shadeyught ne kenghnonweh niwade ne jikaghwistaex yakwadonghkaryax, ony yonkwanyadathenghse, nokhony onkwahhayenghsoskon, nokhony yonkwatkonghrehkon, nokhony yaghddeyonkwayen ji-nonweh nayonkwanakdadokenh-hake;

12 Neony yonkwadaderonghyakendonh, yonkwadatydenghstonh nakwah iih akwasnonkeh; waodadenre yonkwahhetkenghdonh, wakhiyadaderighste, yonkhighwishatha, ne yonkwaronghyakendonh;

13 Yonkhirighwaeghstenny, wakwarighwaneken: waonkhiyonny ji-niyught ne jiyudaraekon ne jiyonghwenjade, neony wahhy yonkwadewennontyonh ne orighwakwekonh shekonh nonwa ne kenghweghniserade.

14 Yaghne dewakhyadonghkwenh ne ken-ikenh karighwaakon ne naesewadehhen, nok eghniyught jikwanorongh'kwa kwayenhokonhah, I-ih wakwanikonradade.

15 Ikenh ethosane nen-oyery niwennyaweeghtseraghs-henh deyetshirighwathedennighs ne Keristustserakonh, shekonh kady yahheso dejisewanighshendaonh; ikenh ne Keristustserakonh Yesus I-ih kwadewedon yurihhonny ne orighwadokenghdy.

16 Ne kady wahhonny, Wakwennidenghden, dakwaghnonderatyeseke iih.

17 Ikenh kenkayen aoriwa Yahhiyadennyeghde ne *Ti-motheus*, ne na raonhha rinoronghk'waonweh riyenhah, nokhony thaweghdaghkonh ne Royanertserakonh, raonhha t'kakonde enseghjhiseweghyaghraghkwen ne ji-niwakhahhondense ne ne etho Keristustserakonh, ji-niyught Jikherihhonyenny ne ji ok nonweh niyadekanonghsadokenghdikeh ony.

18 Nonwa shekonh otyake ne yetshehhode, ji-niyught ne ne Yaghthaonkwa ne isekeh.

19 Nok t'kakondeonweh Yenkwayadorenne kenniyurighweshah, dokat ne Royaner enthanonwene, nokhony t'kakonde enwaktokenghse, yaghne dehhodiwenna ne ne ji-nahhoden ro-nennitshehhoghkwenh, ok se toniyocht ne raodishatstenhsera.

20 Ikenh ne raoyanertsera ne Niyoh yaghneok nowenna, ok kashatstenghserakonh.

21 Oghkady nen-yawenne ne jonhha? nekenh endekhawynokwire nenhenkewe ne isekeh, nedenhens ne adade-noronh, neony ne kanikonrakonh ne yako-nikonghranetskhah?

CHAP. V.

Ne ne yakoderighwaeghstenny ne karighwaneren ne onkweh.

NE wahhy yurihhowanhaonh yurighwakare-nyh, ne ne yutkade eghniyught eghniyawenhonh ne ne kendeughsera ne kanaghkwa ne sewentyughkwakonh, neony neghniyught ne ne kendeughsera yaghdeyeraghk'wa ne kanaghkwa akwah ji-niyught ne yahheghdeyuriwa ne nyaghthakaghseennayendake ne kentyughkwakonh ne nyaghdeyakorighwiuyughstonh, ne ne ao-naghkwaghk'wa ne ro-nihhah.

2 Neony ne sewennitsheghwenkwenh, neony yaghkenh deyaweght daghnnon aeseawatshonnyenghkwe ne ne raonhha neghnihhoyerenh ne ken-ikenh ne ne nenroweyennendaonh doka nonna aondon erenh aonwayadenhhawighde ne sewentyughkwakonh:

3 Ikenh I-ih norighwiyuonweh, ji-niyught sane yahtetewese ne oyerondakonh, ne kanikonrakonh itewese egghyeka-
weyennendaonh, nense dewakyadoreghdaghkwenthonh, ji-niyught ne shaonkwentyughkwah, ne ne ji-niyutyerenh ne raonhha ne neh eghnihhoyerenh ne ken-ikenh kanaghkwa karighwanhightsera;

4 Ne raoghsennakonh ne Eghjhidewayaner Yesus Keristus, ne o-nenh enskatneh ensewatkennisa, neony I-ih ake-nikonra, enke-ne ne raoshattenghsera ne Eghjhidewayaner Yesus Keristus,

5 Ne ne aonsaghjhadako ne Oneghshonghro-nonkeh ne ne jidewadonnhakaryenh ne akowaghronneh, ne ne kanikonra aontyesen aonsakonwayadako ne raodeghniserakonh ne Royaner Yesus.

6 Yaghdeyuyanere naneh sadonweshenghtsera. Yaghkenh desewaderyendare ne ne kenniwaah ne yontdenkwaghta ne enwatdenkwaghde osherkakwekonh?

7 Ne kady wahhonny, desatyadonkoght, natdenkwaghtserakayonh, ne ne aontyesen ase aonsesewadesherhonny ji-niyught nise ne yaghdewatdenkwaghdonh arekho. Ikenh shadeyught ne Keristus yonkwadennyode erenh Ondonkoghte ne na roryughdonh iih onkwariwa:

8 Ne kady wahhonny kinyuh dewadye-nawaghst ne jiwa-dennyode, yaghden nenne natdenkwaghtserakayonh, yahhonny ne thakenhake ne atdenkwaght ne yakodadidaxhadonh nokhony ne karighwaneraaxhera: nok daghnon ne ne yaghdewatdenkwaghdonh kanadaroghk ne ne okthiyutkwathonh ne ok yonnonghdonnyonghk'wa aoskon ne t'karighwayery ony tokenghskeonweh.

9 Orighwadokenghdy ne yekwaghyadonnyh ne isekeh, ne ne toghsa ne shesewentyughkwat aondon ne ne yerighwaneraakhon ne kanaghkwa

10 Shekonh yaghdekakwekonh ne neh ne ok neh kanaghkwa ayerighwaneraakhonhheke ne kenh jiyonghwenjade, nendenhens ne aeseweseke ne yako-noshenh, ne denhens ne yerighwayesaghtha ne kayanerenh, ne denhens ne kayadonnyh konwarighwanekenny; ikenh ethoghkeh nentkakonde densewadonghwenjoghse naesewayakenne ne jiyonghwenjade.

11 Nok nonwa nenwahhy Yekwaghyadonseh ne isekeh ne ne toghsa ne shesewentyughkwah kenhhak, doka onghka ne onkweh ne neh ne aonwanadonghkwe ne yadadekenhah akenhhake ne ne kanaghkwa rarighwaneraax, ne denhens ne yako-noshenh, ne denhens ne kayadonnyh konwarighwanekenny, ne denhens ne rarighwaxhatha, ne denhens ne yeghnkakastha, ne denhens yerighwayesaghtha ne kayanerenh; ne ne eghniyeyadodense yaghden araone enhskahneh tahesewadont.

12 Ikenh oghnenkyere Jienkhejenhhayen ne ro-nonhha ne ne yahheghdeshadiyadare? yaghkenh thadeghsheyadoreghtha ne ro-nonhhakeh wahhy ne ne o-nakonz tho-nadonhonh?

13 Nok ne ne ro-nonhha ne ne atsteh rodiyadontyeghdonh, Niyoh enghshakojenhhayen. Ne kady wahhonny erenh yetshiyadenhhawight ne sewentyughkwakonh ne ne yakorighwaneraaxkonh nonkweh.

CHAP. VI.

Orighwakeh toghsa ao-nakonny nyadadekenhah, ro-naghden-tyonhhatye ne ji-nonweh dewaderighwaghseronnyatha.

SEWARIGHWANONWAX kenh ne wahhetken onghka ok daesewaderihhodarho ne ji-nijonh, yajaghdendyh ne orighwakeh ohhendondh ne yaghdeyuderighwakwarighsyonh, neony yaghden nohhendondh ne jiyuderighwarighsyonh?

2 Yaghkenh desewaderyendare ne ne yakoderighwakwarighsyonh ne denghshakodiyadoreghde ne jiyonghwenjade? nok doka ne jiyonghwenjade den-yetshiyadoreghde ne jonhha, yaghkenh shadeyuriwa ne daesewayadoreghde nakwah jiye-yurighwaghsthoonh ji-niyutyerenh?

3 Yaghkenh desewaderyendare ne ne onkyonhha wahhy denyethiyadoreghde ne kondironghyakeghro-non? do-onghdeh niyaweda senhha ne karighwaokon ne ne eghkayadareghkonh ne kenthoh jiyakonnhe?

4 Dokat kishenh aesewayadoreghdaghtserayendake ne karighwaokon eghkayadareghkonh ne kenthoh jiyakonnhe, yetshihhonkaryak ne ne daadiyadoreghde onghka neken yeyakoghsthonh nakwah ye-noronghk'wa akaweryendakonh ne jiyukarowanenh ne o-nonghsadokenghditserakonh.

5 I-ih wakadady ne ne sewadehhatsera; Eghkenh niyught yaghkenh kaneka deyederon nayako-nikonghrowanenh ne sewentyughkwakonh? yaghden, yahhenskat ne ne ayekweny ne dayeyadoreghde ne tninihhokenh ne yadadekenhah?

6 Nok yadadekenhah ine wahho-ne-nonghdonhhatye jiononka norighwakeh, neony ne raodihhendondh ne yaghdethoneghdaghkonh.

7 Ne kady wahhonny kayen kananonh ne sewaderighwadewaghdondh kanhightsera ne sewentyughkwakonh, aoriwa eghyeseweghtha orighwakeh: Oghniyutyerenh eghnaesewayere aeseweghre saethoh yonkhikaronnyh? oghniyutyerenh aeseweghre saethoh thityonkhiyennonghdons yonkhinikonrhadenh?

8 Yaghdenjy, ise eghnesewayere wesewarighwayadaghdon, neony yetshinikonrhadeny, ony ne ne wahhy sewadadekenhah.

9 Yaghkenh desewaderyendare ne ne yaghdeyakoderighwakwarighsyonh t'kakonde yaghtayondaderakwaghse ne raoyanertsera ne Niyoh? Toghsa sewarighwayadaghdonh; yaghony ne kendeghsera ne kanaghkwa, yaghony ne jiok nahhoden aesevarighwanekennihheke, yaghony oya thaaghsatsteriste ne ok ne sanyakonh, yaghony nanyoh tyakothon-wisen yakendorha jiyakonhe, yaghony thadaesewadaderighwaxhadanyon ne onkweh nesewayadoden,

10 Yaghony ne ye-nenghskwaghs, yaghony ne yako-nos-henh, yaghony ne yeghnekakastha, yaghony ne yakokenghradanitskonh, yaghony ne neh ne deyakodaderighwaghkwasah nok thiyeyondadeghk'waghs kanikonrhodon jiaiyondeniyughste, yaghtayondewenniyughste ne raoyanertsera ne Niyoh.

11 Neony otyake eghnisewayadodenghne; nok se nenjise-wade-nohhareseh, nok waetshiyadaderighste, nenjisewayanere, ne raoghsennakonh ne Royaner Yesus, neony ne akarihhonny ne Raonigonra ne onkwa-Niyoh.

12 ¶ Orighwakwekjihhonh wahhy yuderighwakwarighsyonh niih-neh, nok orighwakwekjihhonh wahhy yaghthiyekayery: orighwakwekjihhonh wahhy nyuderighwakwarighsyonh iih kewenniyu, nok yaghdeyaweght akathondade ne ne ayonkeshatstenghserakenny onghka kiok.

13 Owaghronhhokon wahhy enwatste no-nekwenda, neony ne o-nekwenda aowenh nowaronh; nok Niyoh t'kakonde shaghdondane dejaronh nethoh, Nonwa ne oyeronda yaghne dekaghsehhennyh ne kanaghkwakarighwaneren, ok tenhnon raowenghk ne Royaner, neony ne Royaner raowenghk ne oyeronda.

14 Neony Niyoh eghnihhoyerenh dejaronh shoketskwenh ne Royaner, nokhony shadenhhayere enseghshonkwaketsko nonkyonhha ne ne raonhha akwah raoshatstenghsera.

15 Yaghkenh desewaderyendare ne ne sewayerondaokon ne wahhy ne raoghsthonderaokon rao-nhaghdaokon ne Keristus? ne kadikenh Denkeghkwe ne raoghsthonderaokon ne Keristus, oni thaonsakteni nagonni ne aonton ne oghsthonderaokon ne kendeghsera ako-nheghtyen ronwadewendeghtha ne Niyoh? Niyoh rorighwaghstenh.

16 Nahhoden! yaghkenh desewaderyendare ne ne raonhha ne neh ne yadehho-natyeghstonh ne nyaghdewadokenghtha kendeighsera sniyerondat naah? igenh wahhi, rawenh, tekenyh sane nok t'kakonde sniwarat enwadon.

17 Nok raonhha ne ne yadehho-natyeghstonh ne Royanerneh ne ky shahhodinikonrat.

18 Sadekwaghs kendeighsera kanaghkwa, karighwaneren. Ji-niyadekarighwaneraaxherakeh ne ne onkweh ne ji-nenyontyere, yaghna de kayadare noyeronda; nok raonhha ne ne wahhorighwanhike ne kanaghkwa karighwaneren kendeighsera wahhorighwaneraakden ne raoyerondakeh.

19 Yaghkenh nahhoden! desewaderyendare ne ne sewayeronda ne wahhy ao-nonghsadokenghdy ne Ro-nikonghriyughstonh ne nahhoden iwat sonhhatserakonh, ne nahhoden se wayendaonh ne Niyoh-neh, nokhony ne jonhha yaghdesewawenh ji jonnhe?

20 Ikenh wahhy ne jonhha kaghninonh ne ji-niyukarodenh ji-niyukara: ne kady wahhonny eghjhonwesaght ne Niyoh ne jerondakonh, nokhony ne sanikonrakonh, ne wahhy raowenghk ne Niyoh.

CHAP. VII.

Waghshakodady ne jiyako-nyax. Shako-nadonny den-yon-dadenheghseke toghsa ayerighwanerake kanaghkwa.

NONWA, ne ne ji-niyutyerenh ne karighwaakon ne ne deghskwaghyadonseh: Yuyanere naah ne ronkweh ne ne toghsa kenniyaaghsakoyere nako-nheghtyen.

2 Ethosane, tyondonnek, ne ne kendeighsera kanaghkwa karighwaneren, kinyoh niyadehhadyh radiwenniyohak ne ro-ne, nokhony niyadekondyh ne tyunathonwisen kondiwen-niyohhak ne dekondideron.

3 Kinyoh toghsa shaderighwadekoh ne jiro-nyakonh nakwekonh then-yaweryendiyohhake, nokhony shaden-yawenne ehhone nenkondiyere ne jiyudinyakonh.

4 Ne ne ro-ne yahhaonhha deokayadakwe-niyu ne aoyeron-da, ne ne ro-ne rayadakwe-niyu: nokhony shaden-yawenne ne raonhha yahho-ne dehhayadakweniyu ne raoyeronda, ne ne ro-ne kayadakwe-niyu.

5 Toghsa nokthiyadaesewadadeghk'wa, nyareghkwe yen-kahhewe shadense-neryendiya, ne ne aondon aejatste-nyaron ne ne aese-nendontyeghthake nokhony aejaderennayengh-seke; ne ne enjise-nikwekhene are, ne ne Oneghshonghronon yaghtadayadennakeraghde ne ne ayanikonghrahhet-kenghde ne ne sanaghkwakeh ayunetskhane.

6 Nok kenkayen Waktharaghkwenh ne ji-nityonkerigh-wawyh, neony yahheghdetyuyenghdaghkonh ne ji-niwen-nyh.

7 Ikenh Eghnitke-nonwese ne akwekonh nonkwehhokon shadayughdon ji-niyught ne I-ih yadekyadyh: nok niyade-yonkwedakeh odokenhonh yeyutyery yondadawyh Niyoh-neh nityawe-nonh, ne enskat en-yerighwaghse, neony ogh-nakenkeh thikade ne enjerighwaghse.

8 Ne kady wahhonny Wakheyenhhaghse ne yaghdeyako-nyakonh nokhony nyunadeghreonghse, ne na aodiyanerengh-sera ne dokat tyutkonh ne dakondighsnye-ne ji-niyught ne I-ih shadayawen.

9 Nok doka yaghthenkondikwe-nyonhhe neghnayugh-donhhatye, yudinyak nissa: ikenh wahhy senhha yuwey-enstonh ne ayunyake ji-niyught ne ne dokat ayodeke.

10 Neony ne ne yudinyakhon ne Wakherihhon, yagh-sane I-ih dekenh, ok se daghnnon ne ne Royaner; Toghsa aoyadondy ne jiyunyakonh:

11 Neony, doka aonhha enhhoyadondy ne jiyunyakonh, eghky niyughdonhhak toghsa ky jo-nyak, ne ok daghnnon na-onsakarighwaghseronny ne jiyunyakonh: neony toghsa ne raonhha shayadondy ne jiro-nyakonh.

12 Nok shekonh ne otyake I-ih Wakheyadatyase, yaghne Royaner: doka onghkaok ne onkwadadekenhah ao-nyakon nok yaghdetyaweghdaghkonh, nok yaweryendiyughsaonhha nenskatneh aaghniderondake, toghsa shadekwaght naonhha.

13 Neony ne tyuthonwisen yo-nyakonh nok yaghdethaweghdaghkonh, neony doka enhhaweryendiyughseke ne enskatneh enghniderondake naonhha, toghsa shoyadondyh ne raonhha.

14 Ikenh ne yaghdethaweghdaghkonh ne ro-nyakonh ne na ne ro-ne enhhaonnhakwadako, neony dokat ne ne ro-ne yaghdetyaweghdaghkonh raonhha naah enghronnhakwadako: onwa neken shekonh ne sheyenhokonhah yaghten-yakoyanereke, nok nonwa wahhy akoyadadokenghdy naah.

15 Nok doka ne yaghdethaweghdaghkonh erenh enreghe, erenh nissa isreght. Onkwadadekenhah ne denhens ne onkwadennosenhhah yahhe-naghskwa dekenh ne ne eghniyawenghse, nok Niyoh wahhy shonkwaronghyenhha ne jikayanerenh.

16 Ikenh oghnanahhoden saderyendare, O sathonwisen, doka nonnaah ise aonsaghjhadako ne dese-nideron? ne denhens do-niyught nise jisaderyendare, O ronkweh, doka nonnaah ise aonsaghsyadako ne dese-nideron?

17 Nok shadeyught ne Niyoh jisakoyakhonny ne ji-niyadeyakonh, shadeyught ne Royaner jishakoronghyenhharonh thithokwekdonh, etho kady raghdendyh: Nokhony etho Wakerihhowanaghdonh ne ji-niyadekanonghsakeh ne ononghsadokenghdiokon.

18 Nikenkenh kaneka nonkweh ne ayondade-naodonghkwen neghnayughdon aonde-nyendenghston akaghre-nen adatnekoserhon? toghsa eghrayadaran ne yaghdewade-nyendenghstonh kaghre-nenh adatnekoserhon, Nikenkenh kaneka niyondade-nadonghkwenh ne yaghdewade-nyendenghstonh kaghre-nenh adatnekoserhon? toghsa eghrayadaran ne wade-nyendenghstonh kaghre-nenh adatnekoserhon.

19 Wade-nyendenghstonh kaghre-nenh adatnekoserhon yaghnenne othe-non, nokhony ne yaghdewade-nyendenghstonh ne kaghre-nenh adatnekoserhon yahho-ne othe-non, nok daghnon ne ayerighwawakonhhak ne raoghtyawenraghtsera ne Niyoh.

20 Kinyoh niyadeyonkwedakeh kadokenh kenhhak ok ne shakat jinenhoderihondake ji-nonweh thonwanadon.

21 Yaghkenh ise deyesanadonghk'wa ne yesanhase? toghsa sanikonghraxhenh ne akarihthonny; nok dokat ne akarihthonny aonsaghsadadewenniyo-ne, senhha yuweyenstonh ne satstonhhak.

22 Ikenh raonhha ne ne thonwanadon ne Royaner-tserakonh, ne ronwanhase, wahhy shodadeweniyuonh ne Royaner-neh: shadeyught ony raonhha ne ne thonwanadon ne shadadewenniyo, Keristus naah ro-nhase.

23 Kaghninonh na ne jonhha ne ji-niyukara: toghsa ne yesanhasek ne onkwehhokon.

24 Dewadadekenhah, kinyoh niyadeyonkwedakeh ji-nonweh yehhoronghyenhharonh, etho nonweh enskatneh niderondak ne Niyoh.

25 Nonwa, ne ne ji-niyutyerenh ne kondiwinonh, Yaghdhakerighwawyh ne wennyh ne Royaner: shekonh sane I-ih akyadoreghdaghtsera enkheyon, ji-niyught ne ne enskat yakoyendaonhhatye deyakodentshenhonhhatye ne rao-nidenreghtsera ne Royaner ne naondayakaweghdaghkon.

26 Ne kady wahhonny ikeghre yuyanere nekenhenh ne nonwa jiwatyondonnhakary; Kadon, nethoh yuyanere na ne ronkweh neghnen-yughdonhhatye

27 Sadatnerenh kenh ne jisanyakonh? toghsa sesak ne naonsaghsatnerenghsy, aden kady jisatnerenghsyonh ne jisanyakonh? toghsa sesak naonsesanyake.

28 Ok doka enjisanyake, yaghdesarighwanerenh, nok doka ne kawinonh en-yunyake, yaghdeyurighwaneren: etho-sane nenne-eh eghnaawen nok t'kakonde den-yunikonrharen ne owaghronneh; nok enkwanaktharakwen. (Enkwanakdowanaghden.)

29 Nok ne ne kenhenh Kadon, dewadadekenhah, kennaniyurighweshah: jienhho-nadadenron ne ne jirodinyakonh, ji-niyught ne ne yaghthaodinyakon;

30 Neony ne ne yontstarha, shadeyught wahhy ne ne yaghthaontstarhake, neony ro-nonhha ne ne ro-nadonnhahere, shadeyught wahhy ne ne yaghthao-nadonnharake; neony ro-nonhha ne ne radighninonghs, shadeyught wahhy ne yaghthaodiyendake,

31 Neony ro-nonhha ne neh ne rontstha ken-ikenh yonghwenjade, ji-niyugt ne ne yaghthayakohhetkenghdon ayakokarewaghdon: ne akarihhonny ne ji-niyurihhoden ne ken-ikenh yonghwenjade wadohetstane nenneeh.

32 Nok Ke-nonwese ne ne yaghthadaesewade-nikonraren. Raonhha ne ne yaghdehho-nyakonh ne ky na ranikonrare ne karighwaokon ne ji-nahhodenshon ne Royaner raowenghk, do-naayere ne naondahho-nikonghrayeride ne Royaner:

33 Nok raonhha ne ne ro-nyakonh ne neh ranikonrare ne ji-nahhodenshon ne karighwaokon ne ji-niyutyeranyon ne ji-yonghwenjade, do-nayawen ne naanikonghrayeride ne ro-ne.

34 Niken wahhy dekyatdihhenh ony ne t'ke-ninihhokenh ne yu-nyakonh nok ne ne yaghdekanaghkwayenderyh. Ne neh yaghdeyunyakonh ne tyuthonwisen ne kanikonrare ne karighwaokon ne ne Royaner-neh, ne ne aondon ne akarihhonny oyadadokenghdy ok yadejaronh aoyerondakonh nokhony nao-nikonrakonh: nok naonhha ne ne yunyakonh ne ok kanikonrare ne karighwaokon ne ji-niyutyerenh ne ji-yonghwenjade, do-nayawen ne nao-nikonghrayeride ne ro-ne.

35 Neony ne ken-ikenh Waktharaghkwenh ne ne yadesewayadyh ensewadonghradaghkwe; yaghne Deke-nyende ne nakwanhighden dakwaghskothaghse ne isekeh, nok daghnon kenkayen ne ne ji-nahhoden nakwekonh thiyaweryendiyugt, neony ne ne aondon aesewakwekonhhatyeseke ne Royaner toghsa desewennikonghrakhaghsyonkoh.

36 Nok doka kaneka ne ronkweh ne aennonghdonnyonheke ne ne eghnaoyerenhhatye ne yadehhayadyh ne yaghde-tharighwayerits naonhhakeh ne ne rao-nonghsakonh kenderon ne nyaghdekanaghkwayenderyh, dokat naonhha nendenyodonkoghdon ne jikajijonthaghkwe ne ji-nennityoyenh, neony deyudonghwenjohhonh neghniyugt waderighwisak, thihhen-nonghdonh ji-nenhhayere, yaghna thaarighwanerake: rodinyak nissa onghka iweghre kenhhak.

37 Ethosane nenneeh raonhha ne ne eghdehhodatdenghstonh nyaghdeyaweght aonsontkarenghrako ne raweryaghsakonh, royendaonh ne yaghthadaatkary, nok roshatstenghserayen nakwah raonhha ji-nithanonwese, neony eghniyugt rodaderighwisaanyh ne raweryaghsakonh ne ne t'kakonde enhhatye-nawaghste ne kawinonh, tharighwayerit.

38 Etho daghnon, raonhha ne ne ennhaghtkawaghse nayunyake dahharighwayeride; nok raonhha ne ne yaghdeh-haghtkawennyh nayunyake senhha ne yuyanere ji-nah-hayere.

39 Ne ne yunyakonh kanerenh naah natdakwarighsyonkeh ji-nenwe enghronnheke ne ro-ne: nok doka naonhha ro-ne enghrenhheye, o-nenh sondadewennyune enwennonghdon onghka ok enjo-nyake ne ok ne Royanertserakonh.

40 Nok senhha naah yudaghskats naonhha ne doka naonh-ha neghnayughdonhhake, ne ayeyanenhawe ne I-ih agyato-rehtakksera: nok Ikeghre shaden-yawenne ne ne Jiikhawe ne Rao-nikonra ne Niyoh.

CHAP. VIII.

Ne nayondadariste kakon konwadekhonnyase ne kayadonnyh.

NONWA, ji-niyught ne jienwaderihhoryaneron ne ji-nika-rihhodense ne ne eghnonkadyh yejondadaghtkawaghs ne kayadonnyh konwayudenghse, yonkwaderyendare nenneeh akwekonh yonkwanonrat. Kanikonghrowanenghtsera yu-dewerenkwennyh, nok daghnon ne nadade-noronh ne ayon-daderihhonnyen, (karighwiuyughstaghneh.)

2 Neony doka kaneka ne ronkweh aaghreerheke ji ok nahhoden wakaderyendare, yahhothe-non dehhoderyendare shekonh jidaghnon nahhoden aoderyendarake.

3 Nok doka kaneka ne onkweh ennhho-noronghk'wake ne Niyoh, ne shaeyadat ne na ne ronwayenderyh.

4 Ne kady wahhonny, ne ne ji-niyutyerenh, ne jiiyex ne ken-ikenh karighwaokon ne ne eghyeyondawighs yonne-yonghs ne ji-nonka konwayudenghse ne kayadonnyh, yonkwaderyendare ne thoikenh kayadonnyh yahhothe-non deyu-rihhonde ne jiyonghwenjade, neony yaghkaneka oya deka Niyohserayen ne ok enskat.

5 Ikenh ethosane nenne-eh ne ne wahhy konwanadongh-k'wa niyohhokon, doka nonkenh karonghyakonh ne denhens onghwenjakeh, (asekenh eso ne niyohhokon, eso ony ne ka-yanerhokon,)

6 Nok nonkyonhhakeh nese ok enskat ne Niyoh, ne Ranihah, orighwakwekonh raonhhakeh tyuyenghdaghkonh, nokhony raonhhatserakonh nonkyonhha; neony enskat ne Royaner Yesus Keristus, raonhhakeh orighwakwekonh tyuyenghdaghkonh, nokhony raonhha shonkwawenniyu.

7 Ethosane, yaghna ne niyadeyonkwedakeh neghnakani-konghrodenhkake: wahhy otyake, eghniweryendodense ne konwarighwanekenny ne kayadonnyh, ne ne kenghnonweh niwade ne jikaghwistaex iyex ne ji-nahhoden yondawighs ne ji-nonka ne kayadonnyh konwarighwanekenny, ne akaweryendakeh ne yukenhheyonh yuhhetkenhonh naah.

8 Nok ne iyex yaghtayonkwanendonde ne Niyoh-neh yakhony ne thakarihhonny ne doka aedewake, nenkenh senhaha yonkwayanere; yakhony ne doka yaghtayonkwakon, nenkenh senhha waonkwadaraeke.

9 Nok jadade-nikonrarak, onwaneken ehhasayadontyeghde ken-ikenh ji-niyught jisadadewenniyu eghnensayadawen denghsrakwenghdarane ne jikakonghretshakeron akaonhha ne ne akoyadanetskhah.

10 Asekenh doka kaneka ne onkweh en-yesatkagtho, ne ne jisani-konghrowanengh, aaghsatyen aaghseke etho o-nonghsadokenghdikeh ne kayadonnyh konwarighwanekenny, yaghenh na ne raweryendakeh ne ne royadanetskhah ne aodakaridatste ne ne aarake ne ken-ikenh karighwaokon ne ji-nahhoden wahhy konwawyh ne kayadonnyh konwarighwanekenny;

11 Neony ne akarihhonny kenh ne sanikonghrowanenghtsera ne jadadekenhah ne royadanetskhah aaghrenhheye ikenh raonhha wahhy raoriwa ne Keristus rawenhheyonh?

12 Nok ne o-nenh en-yetshirighwaneraakden ne sewadadekenhah, neony engshhekarewaghde ne jiyakoyadanetskhah ne akaweryendakeh, wesewarignwanerake ne Keristusneh.

13 Ne kady wahhonny, doka wakon ne akarihhonny nakyadadekenhah daoderenghsaronkwaghse, yaghoghthao-waghroden Thaonsakeke ji-nenwe en-yonghwenjadeke, onwaneken I-ih enkerihhonny nakyadadekenhah denhhode-renghsaronkwen.

CHAP. IX.

Waghshako-nadonhaghse ne raodewenniyughtsera.

YAGHKENH I-ih dekenh ne kaderighwaghnodons norighwadokenghdy? yaghkenh Dekadadewenniyu? yaghkenh I-ih dehhikenh ne Yesus Keristus Eghjhidewayaner? yaghkenh iih dewakyudenghsera nise ne Royaner-neh.

2 Doka yahhy thenkenhhake ne rarighwaghnodonghs norighwadokenghdy, ne ji-nonka notyakeshon shekonh thadesewanikonrake ne I-ih he isekeh: ikenh wahhy dekaghneghdoghrarakonh ne akwawenghk ne kayadadokenghditserakonh wahhy jonhha ne Royanertserakonh.

3 Sekherighwaserakweny ne ne aonke-nikonghrisake ne ne ken-ikenh;

4 Yaghkenh deyonkwashatstenghserayen naedewake nokhony naedewaghnekira

5 Yaghkenh deyonkwashatstenghserayen ne ne ayethinontshineghson nonkwadennosenhhah, ony deyakwenderon, shadayawenne notyake ne rodiyadadokenghdy, nokhony jiniyught ne rondadekenhah ne Royaner, neony *Cephas*?

6 Aden I-ih ok nok *Barnabas*, yaghkenh deyonkwashatstenghserayen ne ne ayakyaghtkawe nekayudenghsera?

7 Onghka enhhaderighwaghdentyade naderiyughsera ne okthikawenniyu katkeh ne ne raonhha raokaryaxhera? onghka yuyenthonh ne o-nenhhare, nok yaghthaarake ne onenh enwaghyanyonden ne etho? ne denhens onghka konwadinondenghs ne deyudinakarondonhah, neony yaghthayeke ne aodinonda ne deyudinakarondonhah?

8 Wakwaghrory kenh ne ken-ikenh karighwaokon jiniyught ne onkweh? aden yaghne deyawenh norighwakeh ne shakat wahhy?

9 Ikenh eghse niyught jikaghyadon ne raorighwakeh ne Oses, Toghsa se-nyonghsterenk ne deyudinakares ne ne enkondiradaseron enkondinenghstaronko. Denhhaghshnye-ne kenh ne Niyoh ne deyudinakares?

10 Aden rawenh yekakwekonh I onkwarihhonnyat? I onk-warighwashon, karighwadokenghjionh, kaghyadon wahhy ne ken-ikenh: raonhha ne ne rahheghdakarhathoghs ne ne karharatsheriyyuh jienhhahheghdakarhatho: neony raonhha ne ne rents kwaex ne nayawen jikarharatsheriyyuh ehhayadane ne jidehhodonghwenjonyh.

11 Doka en-yonkwayenthon ne isekheh ne kanikonghrakweniyu ne karighwaokon, yurighhowanenh kenh doka en-yakwayenthonko ne sanoshaghtsera karighwaokon?

12 Doka notyakeshon ne en-yerighwenhhawake ne ken-ikenh kashatstenghsera ne navesaghdorarake, yaghkenh senhha nonkyonhha? Ethosane nenne-eh yaghne deyonkwatstaghkwenh ken-ikenh kashatstenghsera; nok yonkwaronghyakenh orighwakwekonh, onwaneken en-yakwayudatshe ne raorighwadokenghdy ne Keristus.

13 Yaghkenh desewaderyendare, ro-nonhha wahhy ne radijihhenghstajyh aoriwa norighwadokenghdiokon ne ronnonnheghkonh ne karighwaokon ne o-nonghsadokenghdi-keh? neony ro-nonhha ne ne ye-nonghne ne jiyeyadaraghs-tha rononnhehkon ne karihwa-ogon ne jiyeyadaraghs-tha?

14 Shadekade ony ne ji-nihhoyerenh ne Royaner shakoyadarakwenh, ne ne ro-nonhha ne ronderighwaghnodonghs ne orighwadokenghdy ne ne ehnaontawe ji enhonnonnheke ne orighwadokenghdy.

15 Nok yahhothe-non ne Dewakatstonh ne ken-ikenh karighwaokon: yalhony Dewakyadon ne ken-ikenh karighwaokon ne ne etho nayonkyere ony niih-neh: ikenh yuweyenstonh wahhy nakihheye, daghnon ne ne kaneka ne onkweh akokon ayonkonny ayonkenhighden aonkwaghdonse nakonwesenghtsera.

16 Ikenh sane I-ih kerighwaghnodonghs ne orighwadokenghdy, yahhothe-non Dewakyeen ne nakonwesaghde: ikenh ne ji-nadeyudonghwenjohhonh iih-neh naah karighwayendaghkonh; odokenhonh orighwiyu, kanikonghranonghwakdenghsera naah ne iih-neh ne doka yaghtthenkerihhowanaghdane norighwadokenghdy.

17 Asekenh doka akwah eghnenkyere ji-neken nikarih-hodenh ne nyaghthaondonke-nisko, En-yonkwadonghraghseronse: nok doka yahheghdedewake-nikonghrodenh, rake-rihhontyeghdennyh ne Niyoh ne nenkaderighwaghdentyade norighwadokenghdy.

18 Oghnakhoden en-yonkwadonghraghseronse ne ethone? Orighwiyuonweh nethoh, ne o-nenh Enkerighwaghnodon ne orighwadokenghdy, onghdony Akkweny ne ne yaghthayukarodane ne raorighwadokenghdy ne Keristus, ne ne Yaghthaakhetkenghde norighwadokenghdy ne ne iih akeshats-tenghsera.

19 Ikenh sane Skadadewenniyu akwekonh nonkwewhokonkeh, shekonh sane Eghniwakadatyerenh yadekyadyh ne akwekonh ako-nhatsera enkenhhake ne ne aondon senhha eso daonsakadentsha.

20 Neony *Jews*-akakeh Dewakadonnionh ji-niyught ne *Jews*-aka; ne ne aondon daonsakheyadentsha ne *Jews*-aka; ro-nonhhakeh ne ne eghyeyadareghkwenh orighwakeh, ji-niyught nehhakyadaraghkwe ne orighwakeh, ne ne aondon Daonsakheyadentsha ne ne orighwakeh yeyadareghkwenh;

21 Ro-nonhhakeh ne ne yahheghdehhiyadiare norighwakeh, ji-niyught ne yahho-niih eghthakyadarake orighwakeh, (yaghdekenh ne yaghthakyadarake norighwakeh ne Niyohneh nonkadyh, nok se eghkyadare ne raorighwakeh ne Keristus,) ne ne aondon Daonsakheyadentsha ne ne yahheghdeyeyadare norighwakeh.

22 Ji-nonka nakoyadanetskhah Ehho-ni niyught wakya-danetskhah, ne ne aondon Daonsakheyadentsha ne akoyadanetskhah: ne Yonkyadisaaghdonh norighwakwekjihhonh ji-nonka nonkwedakwekonh, ne ne Aonkkwenyon nyaonderighwisaaghde aonsakheyadako otyake.

23 Neony kenkayen eghniwakyerenh ne ne orighwadokenghdy aoriwa, ne ne aondon Ehhaonsakyadarane aonsak-yendarane ne ethoh aedeweseke.

24 ¶ Yaghkenh desewaderyendare, ne ne ro-nonhha ne radidakhe-nontye ne dehhorerotye, tehonrahtats akwekonh, nok wahhy enskat en-yeye-na ne ji-niyukara natshennonnyaghtsera? Dejaraghdad kady, o ne ne aondon ne daonse-sewadentsha.

25 Neony niyadeyonkwedakeh ne ne ayondatsteronghse ne ne ayonderighwatkweny wahhy ske-nenhah ok thiyurighwakwekonh. Nonwa, eghnihhodiyyerenh ne ji-nonka ne yakorrhorokdonh ne wahhetkense ne deyakodentshon, nok nonkyonhha yaghdewahhetkense yaghdeyurye-nenhonh.

26 Ne kady wahhonny eghniyught Jidenkaraghdade, jiniyught ne yahhorighwiyu thakenhhake; eghniyught Jikaderiyughs, yahheghdeyught jiniyught ne ne enskat ne aye-konghrehkonhheke ne jiyudeweraratyese:

27 Nok Wakadennikonraren nakyeronda, eghdakeh enkenhhake, neony eghniyenhhenhawe ne naondakerighwayeride; onwaneken ne ken-ikenh akde enwakyadontyeghde, ne ji-o-nenh Kheyaderighwaghnodonyh ne thihhadideshon, I-ih yadekyadyh wahhy aonkyadondako, (ne Niyoh-neh.)

CHAP. X.

Ne ne Jews-aka jiyeyadarase, ne ne onkyonhha onkwade-nyendenghtsera.

SHADÉKADE, dewadadekenhah, Yaghdewakeryendiyughs ne ne yaghtaesewaderyendarake ne jiniyutyyerenh ne ken-ikenh akwekonh yethinihhokonkenhha eghnihhodiyyadawenhonh o-nakonh ro-nadonhonh ne otshada, nokhony akwekonh eghdehho-nadonkoghdonh ne kanyadara-keghkowah;

2 Neony wahhy akwekonh ne ro-natnekoseraghdonh raonhhakeh ne Oses otshadakonh ony kanyadarakonh;

3 Neony akwekonh rodikonh ne shakat ne kakon nekankonghraonweh

4 Nokhony akwekonh ne rodighnekighradonh ne shakat sondon ne kanikonghraonweh ne rodighnekighradonh: (ikenh ne rodighnekighradaghkwenh ne na ne kanikonghrakwe-niyu Otstenra ne na enhhodighnonderatyeghde, neony ne na ne Keristus Notstenra:)

5 Nok eso yakonh ne nyaghdehhonwanikonghrayeridonh ne Niyoh; ikenh ne ne ronwadikarhathonh ronwadikaronnyh ne karhakongh-tseraxhengh-tserakonh.

6 Nonwa, ne ken-ikenh karighwaakon ne ne onkyonhha wahhy endidewadennakeraghde, ne ne aedewaweyennendane aedewarighwayeride ne ne yaghtaedewanosha ne aedewakaghdatyeghde ne karighwaxhenghskwehokon, ji-niyawenhonh ne ro-nonhha ony rodinoshonh.

7 Toghsa ony kayadonuyh sewarighwayennihhek, jiegh-nihhodiyaerenh otyake ase eghniyught jikaghyadon, Ne nonkwehhokon eghdakeh en-yondedarayen watyontskaon nokhony waeghnekira, nok donsayedane sayekennyadane ne nayontkaghritsheronny ayondonweshen kayadaghdonghtsera.

8 Toghsa kinyoh dewarighwanerak ne kendeghsera kanaghkwa, ji-niyught notyake ne ro-nonhha ne rodirighwaneren, neony eghdakeh waeyendane ne seweghniserat dewaghsenh aghsenh yawenre niwennyaweeghtseraghsenh.

9 Toghsa ony eghjhidewanakonnyh ne Keristus, ji-niyught ne ro-natyakeshon jieghniyawenhonh ronwanakonnyh, ony oghnyareokon wahho-naghdonde.

10 Toghsa ony jadonryadeght, ji-niyught ne ro-natyakeshon eghniyught ro-nadonryadeghdonh, neony ronwanaghdondonh ne shako-naghdontha.

11 Nonwa, orighwakwekjihonh ne ken-ikenh ne ji-niyawenhonh ne ro-nonhhakeh ne tyako-nakeraghdanyon: neony rodighyadon ne ne aonsayonkhiyeghyaghraghkwen, en-yakwadennrharatshe ne jideyudonghwenjokdanihon dawe.

12 Ne wahhonny, kinyoh raonhha ne ne rennonghdonnyon irade, ranikonrarak onwa neken enhayatyen.

13 Yaghnenne ne dewadennakeraghdonh desewaye-nah nok neghniyught ji-niyught na neh shadakadeke thikawen-niyu ne onkweh; nok Niyoh naah thaweghdaghkonn, raonhha enhhakweny nyaghkayese thaaghsadon ne ne daesadennakeraghde issy nonka ne ji-nisewakwe-nyonh; nok sannonghweghtsera enke-ne ne dewadadennakeraghdonkeh shadayawen erenh aonsaweghde ne ne aonsesewanyakenne, ne ne aondon aesewakweny ne aesewaderighwenhhawa.

14 Ne kady wahhonny, kwanoronghk'wa dewadadekenhah, sadekwaghs ne kayadonnyh konwarighwanekenny.

15 Wakewenninekenne ji nonka nyako-nikonghrowanenghse nonkwehhokon: dese-niyadoreght ne ji-nahhoden Kadon:

16 Ne ne cup ne kayadaderightsera ne wahhy dewaya-dade righstha, yaghkenh nedekenh ne yonkwaye-nah dekarighwakehhadont ne ne rao-nekwenghsa ne Keristus? ne kanadaroghk ne wahhy ne deyonkwayakhon, yaghkenh ne dekenh ne yonkwaye-nah dekarighwakehhadont ne raoye-ronda ne Keristus?

17 Ikenh yonkwatkade wahhy, shaonkwanadarat, nokhony skayerondat: ikenh wahhy yedewakwekonh yonkwayen-daraonh yonkwaye-nah netho-ikenh skanadarat.

18 Jatthaghtthoh ne *Israel*-aka ne radighnonderatye ne owaronh. Yaghkenh ro-nonhha dekenh ne rodikonh ne ne eghyaonsahho-nadadaghtkawen ne jironwenneyonghk'wa ne Niyoh jiyeyadaraghtstha, rodiyendaraonh rodiye-nah ne jiyeyadaraghtstha?

19 Oghnakhoden Enkiron nethone? ne ne kayadonnyh the-nonkenh nenneeh? ne denhens ne thoikenh ne ji-nakhoden ne yeyakoghtkaon ne nakonwenneyonghkwe ne ne kayadonnyh the-nonkenh nenneeh?

20 Nok kadon, ne ne ken-ikenh karighwaokon ne ji-nakhoden ne nyaghdehhodirighwiughstonh eghyeshondadaghtkawaghs o-neghshonghro-nonkeh, yaghden ne Niyohne; yagh n'I-ih deke-nonwese ne yadaesewatyeghste aeseweseke ne o-neghshonghro-nonhokon.

21 Yaghthaesewakweny aesewaghnekira ne rao-cup ne Royanor neony ne rao-cup ne o-neghshonghro-non: yaghthaesewakweny aonsesewayendarane ehhaonsesewayadarane ne raodekhwaraghk ne Royaner, neony ne raodekhwaraghk ne o-neghshonghro-non.

22 Eghkenh niyonkwayerenh eghjhidewanakonnyh ne Royaner ne kanoshaghtsera? senhha kenh iih yonkwayadaghniron ji-niyught ne raonhha?

23 Orighwakwekjihhonh tyurighwayerionh niih-neh, nok yakhakwekonh dewakeweyenstase: orighwakwekjihhonh tyurighwayerionh niih-neh, nok orighwakwekonh yaghsenhha deyakodaderihhonnyennyh nayako-nikonghrayendane.

24 Toghsa onghka nonkweh aaghresake ne raowenghk, nok niyadeyakonh thiyedeshon akotshokowaghsera.

25 Jiok nakhoden enwadenghninonhhake ne jiyondewaghraghninondaghk'wa, neky enghseke, yaghthaaghserighwanendon aaghserighwisake ne enryendakeh akarihhonny:

26 Asekenh ne onghwenja Royaner naah raowenghk, nokhony ne ji-nikananonh ji-nikayen.

27 Doka kaneka ne ji-nihhadyh ne nyaghdetho-neghdagh-konh aodayesennonke ne jiwadennyode kakon, nok eghwe-seweghde; ji ok nahhoden en-yesakeghronhaghse ne sahhen-donh sek, yaghtaaghserighwanendon aaghserighwisake en-ryendakeh akarihthonny.

28 Nok doka kaneka nonkweh en-yesenhhaghse, ne ne ken-ikenh konwawyh etho yejakoghtkawenh ne nonka ne kayadonnyh konwarighwanekennighs, toghsa sek ne ne ra-onhha aarihthonny ne ne yanadonny neony enryendakeh akarihthonny: asekenh ne onghwenja ne na ne Royaner raowenghk neony ne ji-nikananonh ji-nikayen.

29 Kadon, yahhise, deseryenda, nok wahhy thiyede: nahhoden karihthonny ne jikewenniyu ne dayongyatorehte ne thiyonkwedadeshon akaweryendakeh.

30 Asekenh doka I-ih akarihthonny ne raodenrat ehhaon-sakyadarane aonsakyendarane, nahhoden akarihthonny wahhetken Ayonkewennarane ne akarihthonny ne ji-nahhoden Wahhiyadonren?

31 Ne kady wahthonny dokat ensewake ne denhens ensewaghnokira, ne denhens nok thikawenniyu ji-naesewatyere, akwekonh eghnase-niyer ji-nonka ne raonwesenghtsera ne Niyoh.

32 Toghsa yasheyonh ne deyuderenghsaronkwaght, yahhony ne *Jews*-akakeh, yahhony ne ji-nonka ne yaghdehhodirighwiuyughstonh, yahhony ne rao-nonghsadokenghdikeh ne Niyoh:

33 Shaden-yawenne Jienkhinikonghrayeride akwekonh nonkwehhokon ne ji-niyadekariwakeh, yaghdekesax ne yade-kyadyh akadonghradaghkwe, ok daghnon ne ne eso yakonh ayondonghradaghkwe, ne ne aontyesen aonsahhodiyaadako jiatkaronnyat.

CHAP. XI.

Raonhha waghshakorighwaeghsten aoriwa otyugkwadokenghdy.

EGHNIYUGHDONHHAK dakwaghnonderatyeseke, shadekade ji-niyugt ne I-ih ne Keristus.

2 Nonwa I-ih Wakwanendon, dewadadekenhah, kenkayen dakweghyarak norighrighwakwekjihhonn, neony sewa-righwenhhawe ne ji-niyenyuderighwinonn ne ji-nikwennyh, ji-niyugt jikwarihhontyenseh ne isekeh.

3 Nok ke-nonwese ne ken-ikenh naesewaderyendarake, ne kayadakweniyu ne ji-niyadeyakonn ne wahhy ne Keristus; neony ne na rayadakweniyu ne rajin ne tyuthonwisen, neony ne rayadakwe-niyu ne Keristus ne na ne Niyoh.

4 Niyadeyakonn yakoderennayen nendenhens ohhendonn yehhariwakenghs, roderhorokyh ne rao-nonjineh, yaghdeh-hokonnyenghst ne rao-nonjineh.

5 Nok ji-niyadekondyh ne tyunathonwisen ne ne yonaderennayen nendenhens nyakariwaken nisy naoriwadyh ne nao-nonjineh aoderhoroxhy, yaghdeyukonnyenghst; ikenh se shadeyugt ji-niyugt ne doka aonhha ayutkenkaron.

6 Ikenh doka ne tyuthonwisen ne ne yaghdeyuderhorokyh, kinyoh shadeyawen watkenkar; nok doka ne tyuthonwisen enwadehhenghseke naonde-nonghkare nendenhens naontkenkare, kiasa yude-rhoronhhak.

7 Ikenh ne ronkweh; jiorighwiyu, yaghdeyuweyestonn naaderhoroke ne rao-nonjineh, aoriwa nethoh ji-niyugt jiraonhha thodadennakeraghdonn ony raonwesenghtsera ne Niyoh: nok ne tyuthonwisen ne na raonwesenghtsera ne ronkweh.

8 Ikenh ne ronkweh yaghwahhy ako-nheghtyenkeh de-thoyenghdaghkonh; nok ne tyuthonwisen ejinneh wahhy tyuyenghdaghkonh.

9 Yahhony eghdeyawenhonn ne ronkweh ne akonheghtyen ayondatsshenhenny; nok ne tyuthonwisen raowenghk ne ronkweh.

10 Ikenh kenkayen aoriwa yuweyenstonh ne tyuthonwisen nayushatstenghserayendake nao-nonjineh, enkarihthonny ne kondironghyakeghro-non.

11 Ethosane nenneeh, yaghwahhy ony ne ronkweh dehaonhhaah yaghdeyeyadare nako-nheghtyen, yakhony deyaweght ne tyuthonwisen nokthiyaonhhaah yaghne rajin, ne Royaner-tserakonh.

12 Ikenh ji-niyawenhonh ne tyuthonwisen kaji-nadakonh tyuyenghdaghkonh, shadeyawenhonh ehho-ne niyught ne rajin shadeyught ako-nheghtyenkeh o-nenneeh: nok orighwakwekjihhonh Niyohneh.

13 Jadatjenhhayenh ne jonhhatserakonh; Wahhy yuweyenstonh kenh ne ne tyuthonwisen naonderennayen Niyohneh nyaghdeyuderhoroxhonh?

14 Yaghkenh dekenh shadayughdon eghniyughthonweh shaoyerat ne sarihthonnyenny, ne ne doka ne ronkweh rononghkwiseres, wahhy yudehhat ne raonhhakeh?

15 Nok doka ne tyuthonwisen yunonghkwiseres, ne wahhy naonsenghtsera ne raonhhakeh: asekenh wahhy konwawyh nao-nonghkwis nen-yuderhorokdaghkwen.

16 Nok doka onghka ne onkweh aadadodaghsy aarighwanonghwehhake aatsheroade, yahheghdeyonkwarihodenh, yakhony ne kentyughkwadokenghdikeh ne Niyoh.

17 Nonwa, ne ken-ikenh ne Wakwarihhowanaghden ne isekeh, yaghtakwanendon, ne ne enskatneh ensewatkennisa yaghsenhha thayuyanerenne ok senhha okhekenh wakada-raeke.

18 Ikenh, ne jityutyerenghdonh nakwekonh, ne o-nenh enskatneh ensewatkennisa ne o-nonghsadokenghdikeh, Wakaronke ne ne ethoh desewennikonghrakhaghsyonkwenh ne sewentyughkwakonh; yukwenghraron ony Dakeghdaghkwe.

19 Ikenh nethoh t'kakonde wahhy ony wesewarighwayadaghdon akde niyesewanikonghrehhah ne sewentyughkwakonh, ne ne ro-nonhha ne ne yakodatyadake-nhenh yakodatyudenghse ne naontyesenh hake ayakotsheronnyaghkwenhthon thayutkwathon ne sewentyughkwakonh.

20 Ne o-nenh enskatneh ensewatkennisa, skanakdatneh, yaghwahhy ne dekenh ne ken-ikenh naesewake ne Royaner yukaraghskhah kakon.

21 Asekenh ne jideyontskaon niyadeyakonh wahhadiye-na dontyerenghde ji-niyught notyake raowenghk ne yukaraghskhah kakon: nok shayadat radonghkaryax, nok ne shayadat ro-nonghwaraghdonhonh.

22 Atskwyh! yaghkenh desewanonghsodon ne ne aese-waeke nokhony ehhaesewaghnekira? aden sewakenghradany ne raotyughkwadokenghdy ne Niyoh, neony enhhonwanadehhade ne ne yaghdehhodiyen? Oghnahhoden Enkwenh-haghse nisekeh? Enkwanendon-kenh neghnen-yughdon? yaghna thakwanendon.

23 Ikenh I-ih wahhy wakyenah ne Royanerneh ne shakat ne ji-nahhoden Kwarihhontyenseh ne isekeh, ne wahhy ne Royaner Yesus, ne shonghsodat ne ne shathonwani-konghraseren, wathanadaraghkwe:

24 Neony, ne o-nenh shahhadonren, wathayakhon, neony wahhenron, Je-nah, sek; ne na nakyeronda, ne na watyetshiyakhonhaghse; eghnajer ken-ikenh ne nenghskweghyaghraghk'wake.

25 Oghnakenkeh ne shakat ji-nahhayere shatyawenne watraghkwe ne cup, ne o-nenh shihhok'wendaonh, wahhenron, Ne ne ken-ikenh cup ne na ne ase dekawennendaonh ne nake-nekwenghsakonh: ken-ikenh eghnase-niyer, ji-nen-yutkadeke ensewaghnekira, dakweghyarak ne iih.

26 Ji-nen-yutkadeke ensewake ne ken-ikenh kanadaroghk, neony ensewaghnekira ken-ikenh cup, eghnase-niyer jodaghsyh ne Royaner rawenhheyat ji-nenwe dentre.

27 Ne kady wahhonny, onghkakioh ne t'kakonde en-yeke ne ken-ikenh kanadaroghk, neony en-yeghnekira ne Royaner rao-cup, yaghdeyakodadeweyennendaonh, t'kakondane wahhy en-yakoderighwaeghsten en-yakotkarayenhaghse ne raoyeronda nokhony ne rao-nekwenghsa ne Royaner.

28 Nok kinyuh radatkaen-yonh nyadehhayadyh, neony ethone kinyuh irak nethoh kanadaroghk, nokhony raghneki-rah nethoh cup.

29 Ikenh ne raonhha ne ne enrake nokhony enhhaghnekira ne ne yaghdehhodadeweyennendaonh, nok enrake enhhaghnekira ony enhhadejirenghdaghkwe ne yadehhayadyh, ne nyaghdehhoderhoroxhennyh ne Royaner raoyeronda.

30 Asekenh kenkayen tyuriwa yutkade nen-yakoyadanetskhah nokhony kanradarinese ne sewentyughkwakonh, nokhony eso nyakowendaonh.

31 Ikenh doka daedewadatyadoreghde nyadedewayadighshon, yahho-ni thadayonkhiyadoreghde.

32 Nok ne o-nenh en-yonkhijenhhayen, enghshonkwaghrerewaghde ne Royaner, ne ne yaghlthaaghshonkwadaghwaghswen ne Royaner yaake-neghde ne jiyonghwenjade.

33 Ne wahhonny, dewadadekenhah, ne o-nenh enskatneh endewatkennisa ne ne daedewatskaonh, sewenderondak shaden-yawen notyake.

34 Neony doka onghka ok ne ronkweh radonghkaryax, ji-nisa tho-nonghsode dethatskaonh: ne ne toghsa ne yadese-watyeghst aese-watkennisa ji-nonka nadewendeghtsera. Nok notyake Ensekhe-weyennendase ensekhek-wadakwen ne o-nenh Tentke.

CHAP. XII.

Ne kanikonghraonweh yondadawighs ne ji-niyeyuderighwionh.

NONWA ne ne ji-niyutyerenh ne kanikonghraonweh yondadawighs, dewadadekenhah, yaghdeke-nonwese nyaghlthaesewaderyendarake.

2 Sewaderyendare nenne-eh jonhha neghniyughdonne yaghdesewarighwiyughstonh, eghsewayadaghwidonh ji-nonkadyh ne ken-ikenh yaghdewadady kayadonnyh ne konwarighwanekenny ne shatyawenne ne waetshiyaghsharine.

3 Ne kady wahhonny Wakwanikonghrayendaghden, yaghneken onghka ne onkweh ne deyakoghtharaghwonh ne Kanikonghrakeh ne Niyoh ronwayesaghdonh ne Yesus ronwadewendeghdonh: nokhony yaghonghka ne onkweh thayekweny ayairon ne neken ne Yesus ne na ne Royaner, nok daghnon ne enkarihonnny ne Ro-nikonghriyughstonh.

4 Nonwa, kenwahhy niyught dekyatdihhanyonghs jiyondadawighs nok se ok ne Shakanikonrat.

5 Nok sane dekontdihhanyon ne ji-niyonkhiyerase, nok se ok ne Shakayaner-tserat,

6 Neony wahhy dekadihhanyon thadeyakoyudenghserade-nyon ne ji-niyontyerha, nok se wahhy ok ne shaka-Niyoh-serat ne ne royudenhonh orighwakwekonh orighwakwekjih-honh.

7 Nok ne thontkwatho ne Kanikonra ne wahhy yondada-wyh ne niyadeyakonh ne ne ayondonghradaghkwe yenwat-kwekde notyake.

8 Ikenh nense enskat yondadawyh ne Kanikonghrakeh ne nowenna ne kanikonghrowanenghtsera; nare thiskade, ne nowenna ne natdokhatsera ok se ne Shakanikonrat;

9 Nare thiskade, teweghdaghkonh ok se ne Shakanikonrat; nare thiskade, ne ne yondadawighs ne ne jakojendaghk'-wa ok se ne Shakanikonrat:

10 Nare thiskade, ne kayudenghsera ne ne yutyanade-nyon; nare thiskade, ne ne ohhendongh yehhadiriwakenghs; nare thiskade, ne ne waeken wakoderhoroxhen thakotkwa-those ne kanikonra; nare thiskade, ne ne dekyatdihhanyon eso ji-niyadeyewennodenshon; nare thiskade, ne ne niyade-yakaonghwenjakeh ne nyondewennakaradats.

11 Nok ken-ikenh thikayudenghserakwekonh ne ji-nika-yudenhonh wahhy enskat nokhony yadekayadyh ne ok Ska-nikonrat, yudekhaghsyonkwenh ne ne niyadeyakonh adenno-serhenh enwadoghwiha thenhhennonghdon.

12 ¶ Asekenh wahhy ji-niyught ne skayerondat, nok yude-nhaghdakade, nok skayerondat akwekonh ne jityun-haghdondon, anyuh eso, ne ne skayerondat; eghkady o-ne-niyught ne Keristus.

12 Ikenh wahhy Skanikonghratneh yedewakwek ne yonk-highnekoseraghdongh ethoh skayerondat, doka kishenh *Jews*-aka nedewayadoden nedenhens nyaghdeyongkwarighwiyugh-stonh, doka kishenh dewanerenh nedenhens dewadadewen-niyu; neony wahhy eghniyawenhonh akwekonh ne kagh-senhennyh ne nen-yeghnekira ji-nonweh ne Skanikonrat.

14 Ikenh noyeronda yaghna enskat ok thadeyughsthon-dere, ok eso naah.

15 Doka noghsida enkenron, Aoriwa yagh I-ih osnonghsa dekenh, yaghky Dekyadare noyerondakeh; wahhy, ne wah-honny, yaghkenghne oyerondakeh dekyadareghkwenh?

16 Neony doka nohhonghda aakenron, Aoriwa jiyagh I-ih dekenh nokara, Yahheghdekyadare oyerondakeh; wahhy, ne kadikenh enkarihonnny, yahheghdekyadare oyerondakeh?

17 Doka noyerondakwekonh okara akenhhake, ka kady neghnonweh niyonghronkatha? dokat akwekjihhonn ne enyakothondeke kane-nonweh, kanenonweh nayakoswaghseke?

18 Nok nonwa Niyoh wahhy wadeghshakoghsthonderonnyon ne niyadeyakonh ne oyerondakeh, eghniyught wahhy wahhaweryendiyu.

19 Neony doka yehhadikwekonh shodighsthonderat ak-enhhake, ka kady ne oyeronda?

20 Nok nonwa eso wahhy dehhodighsthonderon, nok shekonh ne ok skayerondat.

21 Neony ne okara yaghthakakweny ayawenhhaghse ne osnonghsa, Yaghthadekon-yadonghwenjonyh; yakhony neh, o-nonjyh thayawenhhaghse nosida, yaghthadekon-yadonghwenjonyh.

22 Yaghdn, senhha eso ne ken-ikenh yunhaghdondonnyon ne oyerondakeh, ne ne ayenghre senhha oghsorha yukenhheyon, wahhy deyudonghwenjohhonn o-nenne-eh;

23 Neony tho-ikenh deyughsthonderonnyon ne oyerondakeh, ne ne yakweghre yughsthoonh natkonnyenghtsera, etho ken-ikenh eghyeyonkwatyonh eso yaontkawen natkonnyenghtsera; ne ne jiyaghdeyonkwaweyenstonh eso yaontkadade ne yuweyenstonse.

24 Ikenh ne ji-nonkadyh yonkwayadaweyenstonh yaghse ne thadeyudonghwenjohhonn, nok se Niyoh roghniradonn ne oyeronda yadehhoyeghstonh, shonkwaghtkawennyh ne senhha aontkadade ne yutkonnyenghtst ne ne ji-nonka deyudonghwenjohhonn ji-nityodokde:

25 Ne neh eghnonweh ne ne toghsa daondekhaghsyonko dakarine nakorighwiyughstaghk noyerondakonh; nok ne nthoh ji-nadeyughsthonderon ne shakat enskat jienkondinikonrarake.

26 Neony doka kishenh skaghsthonderitserat kayese enwadon enkaronghyaken, yenwatkwekde akwekonh enkondironghyaken ji-nadeyughsthonderon; nendenhens ne skaghsthonderitserat en-yutkonnyenghtstane, yenkarighwendaghde akwekonh ji-nadeyughsthonderon shadenkondonnharen.

27 Nonwa wahhy jonhha shoyeronda ne Keristus, neony ne raoghsthondera nakwah yadesewayadihshon.

28 ¶ Neony Niyoh roweyennendaonh rokwadakwenh eghdeghshakodenghstonh otyake ne o-nonghsadokenghdi-keh; tyutyerenghdonh, ne ne rodiyadadokenghdy ronderigh-waghnodonghs; teke-nihhadont, ne neh ohhendonh yehhadi-riwakenghs rontrorighs; aghsenhhadont, ne ne shakodirih-honnyenny; oghnakenkeh nenne-eh, yutyanadanyon: ne ne shako-nawighs ne enjakojede, shakodiye-nawase, koragh-kowatshon, ne ji-niyadeyewennodenshon.

29 Akwekonh kenh rodiyadadokenghdy? akwekonh kenh yehhontrorighs nissy naoriwadyh? akwekonh kenh shakodirihhonnyenny? akwekonh kenh rodiyude-nyon yutyanade-nyon?

30 Rodiyen kenh akwekonh ne ronwanawyh ne nenjako-jende? eghkenh nihhodiyaerenh akwekonh kenh niyadehha-diennodenshon? eghkenh nihhodiyaerenh akwekonh kenh rondewennakaradats?

31 Nok she-noshah kasennikonghrakondaghk ne naonh-hah yuyanere jiyondadawighs: nok shekonh Enkwanadon-haghse senhha eso jiyuthahhatkonnyenghst.

CHAP. XIII.

Akwekonh ne ne yondadawighs, nok yaghdekayadare nadade-noronh yaghky othe-non deyurikhonde.

ETHOSANE ne Waktharaghkwenh ne ji-niyewennodense ne onkwehhokon neony ne karonghyakeghro-non, nok yaghdewakyaen nadade-noronh, Anonkyadawen ji-niyught ne nayuristakarheke, ne denhens ayakaondawedon yuwennothiye jiyurakaghre.

2 Nokhony ethosane Yonkerighwawyh nissy naoriwadyh yenkatrory, neony kaghronkha akwekonh ne ji-niyudagh-seghdanyon nokhony akwekonh naghronkhatsera; ethosane Ikhawe akwekonh ne teweghdaghkonh, ne ne aondon Aak-kweny erenh aakhawighde ne yunonde-nyon, neony yaghdewakyaen nadade-noronh, yahhothe-non n'l-ih.

3 Ony ethosane Kheyeridyh akwekonh nakwadaghkwen-nya ne ne en-yakoghdaghde ne yakodenghde-nyon, ony ethosane Kheyawyh nakyeronda ne nayontshaaghde, neony yaghdewakyen nadade-noronh, yaghwahhy othe-non thakadonghradaghkwe.

4 Adade-noronh wabhonnise shadewennikonghkaryenh, nok tyurighwayery yuyanere naah; adade-noronh yaghwahhy deyunoshat, adade-noronh yaghden nok thayutkwathon thayutshagnighdon thaondonnonghdon yadekayadyh, yaghne deyetshehhode,

5 Yaghwahhy deyaweght wahhetken ji-naontyere nyadekayadyh jideyekanere, yabhony dewesax nyadekayadyh aowenghk, yaghwahhy dewatyesenh ne ayunakonnyade, yaghne dewennonghdonnyon ne wahhetken;

6 Yaghdewadonnahhere ne sewaderighwadewaghdonh karighwaneren, nok kenkayen daghnon wadonnahhere ne ji-nonweh ne tokenghskeonweh

7 Wadahkatstat orighwakwekonh, tewehtahkon orighwakwekonh, ne nayawen ne ji-nadeyudonghwenjohhonh orighwakwekonh, tyutkonh en-yurighwadatye orighwakwekonh.

8 Adade-noronh yaghnonwendonh thiyadakarighwarine aondokden: nok yaghdekadokenh ne nohhendonh atrory-aghtsera, denhhodirighwarise enwadokden; doka nonkenh ne ne niyadeyewennakeh ehhenhho-nattatshe; doka nonkenh eghnonweh jikanikonghrowanenghtsera, t'kakonde enhhonnaghdonse kathonghdeh.

9 Ikenh yonkwaderyendare yukwenghraron, nokhony yedewariwakenghs yukwenghraron;

10 Nok ne o-nenh ne ne ji-nahhoden norighwiyu yenkayeride ne na onwe, ethone ne ne ji-nahhoden nokthiyukwenghraron t'kakonde waderighwaghdonghsere nenne-eh.

11 Ne ne ethone Shikexhaah, Wakthare anyuh exhaah, Yahhonke-nikonghrayendane anyuh exhaah, jiony Ken-nonghdonnyon anyuh exhaah; nok, ji o-nenh eghnaawen Wakadeghyaron, erenh Wakhawighde ne ji-niyught ne exhaokonhah ne ji-nikarihhdense.

12 Ikenh nonwa waakwaken yatyuhhetste owisakonh tyukaraghs aghsadakonh; nok ethone daghnon endewadat-konghsaken; nonwa Nenhonkwaderyendarane yukwengh-raron; nok ethone daghnon t'kakonde Enwakaderyenda-rane shaden-yawenne ony ji-niyugt Jiyonkyenderyh.

13 Nok nonwa yekenderon ne teweghdaghkonh, ne yur-harats, adade-noronh, ken-ikenh aghsenh; ok ne aonhhaah karihhowanenh ji-neken nikarihhdense ne ne adade-noronh.

CHAP. XIV.

Ohhendonh yehhontorighs radinendonghs eghnighshakodiyerese.

SERIGHWAGHSER ne adade-noronh, neony ne serigh-wanekhah ne kanikonghraonweh ne adadawy; nok senh-ha yuweyenstonh ne jonhha aondon yaesewariwaken.

2 Asekenh ne raonhha ne ne radadighs ne yaghdeyewennayenderyh ne ji-nihhawennodenh yaghky na onkwehho-konkeh dehhoghthare, ok daghnon Niyohne: ikenh yah-honghka nonkweh dehhonwaghronkaonh, ethosane kani-konrakonh jiwahhadady yutyanade-nyon naah.

3 Nok raonhha ne ne yehhariwakenghs nissy naoriwadyh, radadighs nonkwehhokonkeh ne ne ayakotyeghstennihhatye ayutye-nionhhatye ony ayeghrejaron, nokhony ayakaonri-shendane.

4 Raonhha ne ne radadighs ne ne yaghdeyewennayenderyh, waghoyeghstonhhatye yadehhayadyh; nok neh yeh-hariwakenghs, rotye-nighdonhhatye shakorihhonnyenny ne kentyughkwadokenghdy.

5 Ke-nonwese ne ne sewakwekonh ne aesewadatyade ne jiniyadeyewennodenshon; senhha yuweyenstonh ne jonhha yaesewariwaken: ikenh rarihhowanenh naah ne ne yehhari-wakenghs senhha ji-niyugt ne ne radadighs ne niyadeyewennakeh, ne ok daghnon ne radewennakaradat, ne neh ne akarihhonny ne kentyughkwadokenghdy ayakoye-nahhatye ayakotyeghstennihhatye ayakodaderihhonnyennihhatye.

6 Atskwih, dewadadekenhah, doka nonkenh entke ne isekheh ne Enkadatyade ne niyadeyewennakeh, oghnahhoden Enkon-yatshennonnyaden, nyare ne Enkon-yadatyaden nisekeh kaok entkayenghdaghkwe ne ji-nihhorighwadadonh Niyohneh, nedenhens kanikonghrowanenghtserakeh, nedenhens nissy naoriwadyh yakatrory, nedenhens ne ji-nikarihho-denh norighwakeh?

7 Neony jiokhony thiyught ne ji-niyadekariwakeh yaghdeyonnhe ne aonderakareraghste, ka ok nikayen doka ohonroda nedenhens karenghsodaryh yonderennodaghk'wa, nyareghkwe denkwedewennakhaghsyonko denkwedewennadihhanyon ne jien-yurakareghre, oghnen-yawenne nen-yakodokenghse oghnahhoden naah ne jienyuhhonrodakareghre nedenhens ne jienwaderennoden ne karenghs daryh?

8 Asekenh doka ne kahhonrawatskowah ne jien-ya-kaon yahhorighwiyu jien-yurakareghre, onghka ne en-yondenrharade ne yadeyeyadyh ne jiyonderiyughsere?

9 Eghkady niyught wahhy ne jonhha, nyareghkwe ensewaweyennendane enjisewaroroke ne ensewadatyade ne sewennaghsonneh ne owennaakon watyesenhah ne ne'ayonronke, oghkady nen-yawenne nen-yakoderyendarane ne jinahhoden sewadatyadonh? ikenh jonhha wahhy eghyese-waghthare etho jiyaodatyese.

10 Jiwahhy niyught, neghnayughdon, eso yewennakeh ne jiyonghwenjade, neony yaghkady kaneka nyaghtakarake nyaghtayughronkadon ne ji-nikendon.

11 Ne kady wahhonny, doka Yaghtenwakaderyendarake ne ji-nikendon ne ji-niyewennodenh, raonnhakeh Enkayadarake ne ne radatyatha yaghdehhadokenghtha, neony raonhha ne ne radadighs t'kakonde yaghdehhadokenghtha niih-neh.

12 Shaden-yawenne wahhy ne jonhha, kadokenghjionh wahhy desewadonghwenjonyh ne kanikonghraonweh aondayetshiyon, sewesak ne ne aondon yadaejadohetste ji-nonka ne naejatyeghstennihhatye aesenieweyendeghdaonnhhatye ne o-nonghsadokenghdikeh.

13 Ne kady wahhonny kinyuh raonhha ne ne radadighs ne ne yaghdeyewennayenderyh, raderennayenh nisa ne naondon nok thaakwatho.

14 Aseken doka Akaderennayen ne ne yaghdeyewenna-yenderyh ake-nikonrase onderennayen; nok nakwaghronkatsera yaghdeyunenhhondaonh naah

15 Oghkady neken niyught? Enkaderennayen wahhy enke-ne ne kanikonra, nokhony wahhy Enkaderennayen enke-ne nakwaghronkhatsera shaden-yawenne, Denkeriwaghkwe enke-ne ne kanikonra, nokhony Denkeriwaghkwe nakwaronkatsera shaden-yawenne.

16 Kendenhens kayen, ne o-nenh enghsyadaderighste enke-ne ne kanikonra, oghnen-yawenne ne raonhha ne ne aatyenawaghste yunakdode wahhy ne ne yaghdeyondaderihhonn-yennyh nayairon Awent ne jienghsheyadonren, degghskaghn-eraghjionh yaghdehho-nikonghrayendaonh ji-nahhoden sadonnyon?

17 Ikenh akwah orighwiyu daghserighwayeride jiwaghtshadonren, nok ne thihhade yaghnenne dehhorihhowanaghdonh naodaderihhonnnyenny.

18 Dehhinonghweradon niyawenh ake Niyoh ne Ji-niyadekewennakeh senhha eso ne ji-niyught ne yesewakwekonh:

19 'Nok shekonh senhha eso Ke-nonwese nakadady wisk nityudadyh ne kentyughkwadokenghdikeh ne ji-nikaghrongkhatserodenh, ne ne I-ih akewenna ne naondon aakherihhonn-yen notyake shadayawenne, aniyught oyery niwennyawe-eghtseraghshenh nowennaokon ne ne yaghdeyewennayenderyh.

20 Dewadadekenhah, toghsa sewaxhaokonhah kenhhak ne aghronkhatserakonh: ethosane, ji-nonka ne yerighwayesaghdanyon sewaxhaokonhah eghkenhhak, nok neh aghronkhatserakonh jadonkwedisonhonhhah nenneeh.

21 Atdakwarighsyonghtserakonh wahhy kaghyadon, Kenwahhy onkwehhokon ne thikade ji-niyewennodense nokhony thikaghskwendade Enkadatyade ne ken-ikenh onkwehhokonkeh: nok shekonh yaghtayonkwadahhonghsadatshe, radon ne Royaner.

22 Ne kady wahhonny ne niyadeyewennakeh ne wahhy wade-nyendenghstaghkwenh, yaghnanne ro-nonhhakeh dekenh ne tho-neghdaghkonh, nok daghnon ro-nonhhakeh ne ne yaghdetho-neghdaghkonh: nok ne ne yeyeriwakenghs nissy naoriwadyh yaghe shahhodyughkwah dekenh ne ro-nonhha ne ne yaghdetho-neghdaghkonh, ok daghnon ro-nonhha ne ne tho-neghdaghkonh.

23 Dokat, nonkenh ne akarihohonny ne akwekonh ne kent-yughkwadokenghdy enskatneh nonweh nayontkennisa, nok akwekonh ayondady ne niyadeyewennakeh, neony etho enyonwe notyake ne ne yaghdanyakodaderihhonnyennyh, ne denhens ne yaghdetho-neghdaghkonh, yahhonghdekenh thanniron desewennonghwarawenry wahhy?

24 Nok doka akwekonh yeyeriwakenghs nissy naoriwadyh, neony etho dare shayadat ne ne yaghdethaweghdaghkonh, nedenhens shayadat ne ne yaghddehghaghyadonghserayenderyh, enhharihondere-ne akwekjihhonh, dehhonwayadoreghtha akwekonh:

25 Neony ethowahhy niyught yudaghseghdanyon ne raweryaneh ok na thenwatkwotho; etho-niyught, eghdakeh enhhayadayendane yenhakonghsayendane, t'kakonde enhhorighwaneken ne Niyoh, neony denhharighware-nyade ne ne Niyoh waghyatyenhaghse nise-tserakonh ne ne tokenghskeonweh.

26 ¶ Dewadadekenhah, do-niyught nethone? ne o-nenh enskatneh ensewatkennisa, niyadejonh ensewayendake norenadokenghdy, ensewayendake jiok orighwadokenghdy, ensewayendake ony ne niyadeyewennakeh, ensewayendake ne en-yakodokaden Niyohneh entkayenghdaghkwe, ensewayendake nyondewennakaradats. Kinyuh orighwakwekjihhonh eghniyawen ji-nonka yeyurihhowanhaonh.

27 Doka onghka ne onkweh ne enhhadatyade ne yaghdewennayenderyh, eghky niyughdonhhaak jitekenyh, nedenhens yaghden nisy nonweh ne aghsenh, neony ne nenne-eh jeyadatshon jien-yondady; neony shayadat radewennakaradat.

28 Nok doka yaghddekayen naadewennakaradade, kiasa thadehhadodat ne kent-yughkwadokenghdikeh; kinyuh yadehhayadyh yehhadadyh ne Niyohneh.

29 Kinyuh ne ne yehhadiriwakenghs nisy naoriwadyh ne rondadyh tekenyh aghsenh denhens, nok notyakeshon deyeyadoregt.

30 Doka jiok nahhoden ne thaotkwathose yadaodinenghrokden ne ne eghyederon, ne dewatyerenght nyare thadehhadodat.

31 Wahhy sewawenniyu nakwekonh yajatroryh nisy naoriwadyh enskatshon endewaderade, ne ne akwekonh aondon ayondaderihhonnyen ayeweyendeghdane, neony onghdony akwekonh aonsayakaonrishendane.

32 Neony ne raodinikonghraokon ne rodiyadadokenghdy wahhy rondadewenniyu ne rodiyadadokenghdikeh.

33 Ikenh ne Niyoh yaghne dethodaghsawe ne daanikonrharen, ne ok daghnon ne kayanerenh, ji-niyught nakwekjihhonh no-nonghsadokenghdiokon ne jityakoyadadokenghdiokon.

34 Kennen-yughdonhake ne sewanheghtyensera thadeyunadodek no-nonghsadokenghdikeh: ikenh yaghwahhy dekonwadirighwawyh no-nonhhakeh ne nakondady; nok wahhy konwennennyh eghdakeh jadadonnihhak jathondatshek, eghwahhy niyught ony jiyudadyh natdakwarighsyonghtsera.

35 Nok doka othe-non enkondiweyendeghdane, kinyuh o-nonhha ronwadirighwanendonghs ne dekindideron etho aodinonghsakonh; asekenh wahhy ao-nadehhenghsera nehakondadyh o-nonghsadokenghdikeh.

36 Oghnahhoden! isek eh ken h tyuyenghdaghkonh ne raowenna ne Niyoh? aden neken isek eh ok daweghde?

37 Doka onghka ok ne onkw eh enhhadadennonghdonnyonhheke ne royadadokenghdy akenhhake, ne denhens ne kanikonghraonweh, kinyuh rathondat rarihondere-n raderighwenhhawa ne ken-ikenh karighwaokon ne ne yekwaghya-donnyh ne isek eh ne wahhy ne raoghtyawenraghtsera ne Royaner.

38 Nok doka onghka ok ne onkw eh ok thiyakorighwendeh, rorighwendehhak nisa.

39 Ne kady wahhonny, dewadadekenhah, she-nosshah ne ne yeyeriwakenghs nisy naoriwadyh, neony toghsa sheghyaghtyawenrats ne nayondady ne niyadeyewennakeh.

40 Kinyuh orighwakwekonh eghniyawen watyerit, neony ewatsheronnyaghkwenthon.

CHAP. XV.

Ne ne ji-niyawenhonh ji-niyutyerenh jishotketskawenh ne ne rohhahhonnyh ne jienjidewatketskaghseke.

SENNHA issy nonweh, dewadadekenhah I-ih wakwarih-howanaghden nisekeh ne orighwadokenghdy ne wahhy Wakwaderighwaghnodonse ne isekeh, ne wahhy shakat ne ji-nahhoden sewayenah, neony ji-nonweh nonwa nisewaken-nyade;

2 Ne wahhy shakat enjisewayadako, dokat tyutkonh en-seweghyarake ne ji-nahhoden Kwaderighwaghnodonse ne isekeh, dokat yaghden okkhoriwakon jiendiseweghdaghkwe.

3 Asekenh I-ih yekwaghtkawennyh nisekeh, ne tyutye-rengdhonh nakwekonh, ne ne ji-nahhoden Wakyenah ne shakat, ne ne ji-niyawenhonh ne Keristus jirawenhheyonh yurihhonnyh ne onkwarighwaneraaxhera, eghwahhy nika-wennodenh ne kaghyadonghseradokenghdy;

4 Neony ronwayadat wahhy, nokhony shotketskwenh wahhy are ne aghsenhhadont niweghniserakehhadond, egh-wahhy nikawennodenh ne kaghyadonghseradokenghdy;

5 Neony shonsalihoken ne *Cephas*, ethoghkeh nenne-neh tekenyh shadire:

6 Oghnakenkeh nenne, nensahhonwaken issy nonweh ne wisk nadewennyawe nonkwadadekenhah enskatneh: radiyadadokenh ne kentyughkowanenh ne wahho-nadenre ne ne kenthoh yakarighwihhewe, nok otyake yakoyatye-nenhonh yakodaonh.

7 Oghnakenkeh nenne, nishokenh ne *James*: ethoghkeh nenradikwekonh ne rodiyadadokenghdy.

8 Neony ne jiyahhondokden nen-akwekonh sahhonwaken iih ony shatyawen, ji-niyught ne enskatneh onkweh ayakodonhonh yahthakayerine yalhonderighwihhewe.

9 Ikenh I-ih wahhy yewakaghsthonh ne rodiyadadokengh-diokon, yahheghdeyuriwa ne nayonke-nadonghkwe royadadokenghdy, aoriwa Jikhe-nikonghraronghyakendonh ne raotyughkwadokenghdy ne Niyoh.

10 Nok ne ne raodenrat ne Niyoh wakakweny ne I-ih Jinyadodenh; neony rao-nidenreghtsera, ne ne jinahhoden yonkerihhontyenseh nihi-neh, yakhayese deyudonhonh; nok eso Wakadatyudenghste yakyeride wakatye-nighde jiniyught nakwekonh; yagh Idekenh, nok daghnon ne ne raodenrat ne Niyoh ne yake-nikwekonhhatyese.

11 Ne kady wahhonny, doka kishenh I-ih kendenhens kayen ne ro-nonhha, ne wahhy kwaderighwaghnodony, nokhony ne wahhy deseweghdaghkwe.

12 Nonwa, doka ne ayonderighwaghnodonghkwe ne Keristus jishotketskwenh ne kenhheyatneh, oghnahhoden ensewenron otyake ne sewentyughkwakonh ne ne yondonnyon yaghthaonsayontketsko ne yakawenhheyonghseron?

13 Nok doka yaghthenjontketskwaghseke ne kenhheyatneh, yaghky na ne Keristus deshotketskwenh.

14 Nok doka ne Keristus yaghthenshotketskwen, nenky na nonkwaderighwaghnodonghtsera okhoriwakon, nokhony jidiseghdaghkonh okhoriwakon o-nenneh.

15 Etho orighwiyu, neony yonkhirihwatshenri o-nowen jironwarighwaghniradyh ne Niyoh; aoriwa jiok thakwakwatho wakwarihhodaghsy waghshakwarighwaghniratshe ne Niyoh ne ne shoketskwenh ne Keristus; doka kady yaghthenshotketskwen, doka eghnen-yawenhonh yaghky na thaonsayontketsko nyakawenhheyonh.

16 Asekenh doka ne yakawenhheyonghseron yaghthaonsayontketsko, yaghky ky na ne Keristus ony deshotketskwenh;

17 Neony doka ne Keristus yaghthenshotketskwen, okhoriwakon ky na jidiseweghdaghkonh; shekonh kady na sewarighwaneraaxherakonh seayadondarheonh.

18 Ne kady ro-nonhha shaden-yawenne ne ne rodiyatyenonh rodidaonh ne Keristustserakonh ne neh ne ro-nenhheyadonh.

19 Doka ne kenthoh ne jityonnhe ne ok ayonkwayendake dayonkwadonghwenjony nayawen Keristustserakonh, onkyonhha ky na tyonkwedakwekonh yeyudohhetstonh jiyonkwendenh.

20 Nok nonwa wahhy Keristus shotketskwenh jirawenhheyonghne, eghkady tyuyanondaonh ne tyutyerenghdonh yunenhondaonh ne ro-nonhha ne ne ro-nawendaonh.

21 Ikenh ji-nahhe ne ji-nityawenhonh ne onkweh akoriwa jiyaihheyonghse, onkweh ony akoriwa jienjortketskewaghseke ne yakawenhheyonghseron.

22 Ikenh ne ji-nityawenhonh ne Adonh akwekonh eght-yunenhhondaonh ne kenhheyon, shadeyawenhonh kady ne Keristusneh t'kakonde akwekonh enjidewadonnhede.

23 Nok ji-niyadeyonkwedakeh yadeyeyadyh en-yondatkwardakwen: Keristus wahhy tyutyerenghdonh yunenhhondaonh: oderihhokdaghkwenkeh ne ne Keristusneh yeyadareghkwenh ne ne ji-nadentre.

24 Ethoghkeh enwawe enwaderihhokden, ne o-nenh t'kakonde enhhoghtkawen ne kayanertsera Niyohneh, ne na ne Ranihhah; ne o-nenh akwekonh eghdakeh enhhody neyerighwakwarighsyonghskwe, nokhony akwekonh ne wenna-keraghdanyon ony kashatstenghsera.

25 Ikenh raonhha wahhy yadekakonde enthennonghdon, nyare akwekonh dengshakoraghsidakenseraghkwe ne ronwaghswenghse.

26 Ne ne odokdaghkwenkeh ne ronwaghswenghse ne ne t'kakondane raghdondane ne na ne kenhheyon.

27 Ikenh nense orighwakwekjihhonh dehhoraghsidakenseraghkwenh. Nok ne o-nenh ennhenron, Orighwakwekjihhonh wahhy nenroghdoghrarakonh, ne wahhy thiyutkwa-thonh ne ne jiyaghdehhayadare ne raonhha ne ne eghnihhoyerenh orighwakwekjihhonh raonhhakeh shorighwayendaghkwenh.

28 Neony ne o-nenh orighwakwekonh endewadenghnonwenhhonghste endewadadagsthoghde ne raonhhakeh, ethone nentkakonh ne Ronwayen eghse ony ne raonhha nen-yawen eghdakeh ennhadon ne raonhhakeh ne ne orighwakwekonh yehhorihhontyenseh raonhha, ne akarihhonny ne Niyoh orighwakwekonh aarighwakwekhe-ne.

29 Oghkady shekonh nenhhadiyere, nense wahhy ne ronatkoseraghdonh aoriwa ne yakawenhheyonghseron, doka yaghthenjontketskohhe ne yakawenhheyonghseron? ogh-nahhoden kady aoriwa jiyontnekoseraghs aoriwa ne jikenhheyon.

30 Neony oghnaah eghyakwakennyade ji-nonweh nade-yuderyentharah ji-nikonh enkaghwistaek

31 I-ih enkerihhodaghsy enkerighwaghnirade ne sewa-donnhahhere ne ji-nahhoden wakyen ne Keristustserakonh Yesus Eghjhidewayaner, niyadeweghniserakeh Kiheyonghse.

32 Doka ne aakkaghdatyeghde ne ji-niyakorihhodenh ne onkwehhokon Wakaderiyughsyonh ne kondiryu ethoh *Ephe-sus*, oghnahhoden enkadonghradaghkwe doka ne yakaw-enhheyonghseron yaghthaonsayontketsko? Kinyuh dede-watskaonh nokhony dewaghnikirah: ikenh en-yurhenne en-dewenhheye.

33 Toghsa yesanikonrhadenh; Wahhetken karighwane-raaxhera dekonwanaktyakyh wakahhetkenghde nyuyanere ji-nikarihhodense.

34 Sewayeh ji-nonka ne yuderighwakwarighsyonh, toghsa ony serighwanerak, ikenh otyake wahhy yaghdeyako-nikonghrayendaonh ne Niyohnh: ne Waktharaghkwenh ne ken-ikenh ji-nonka ne sewadehhenghsera.

35 Nok otyake nonkweh en-yairon, Oghnen-yawenne jienjontketsko ne yakowendaonh? neony oghnikayerondoden enjakotstonhhatye jienjonwe?

36 Sendeh? ne ne ji-nahhoden waghsyenthoh yaghwahhy deyudonnhedonh onderako wakenhheye.

37 Neony ne ne ji-nahhoden waghsyenthoghde, yaghwahhy ne desayenthoghdonh ne ne tkakonde ne shakayerondot akenhhake, nok daghnon kanenhhonden, ne kady ne yeskawenniyu ennekeriy yaondon, nendenhens ne otyake ne oya nakanenhhoden:

38 Nok Niyoh wahhy rayerondawih ne ne raonhha jinihaweryendiyughs, ne ne jiniyadekanenhhakeh aonhha aoyeronda.

39 Owaghronhhokon yaghwahhy shaowarat dekenh: nok enskat ok nenne jiniyawaghronden ne onkwehhokon, thiyuwarade nenne ne katshe-nen kondiryu, thikade ony ne kenjonghkhokon, thikade ony ne jidenhokonhah.

40 Etho o-ne niyught kayen ne jiniyught ne karonghyakonh noyerondaokon, neony noyerondaokon eghkareghkwenh onghwenjakeh: nok ne onwesenghtsera ne jiniyught ne karonghyakonh enskat naah, neony ne onwesenghtsera ne ne onghwenjakeh kareghkwenh thikade nenneh.

41 Wahhy jonwesenghtserat ok ne jikaraghkware, nokhare thijonwesenghtserade ne neghnida, nokhare thijonwesenghtserade ne ne ojistoghhokon; asekenh ne skajistoghwat dekyatdihhenh ne thikade nojistoghk ne onwesenghtsera.

42 Eghkady ony niyught jienjontketsko ne yakowendaonh: ne wahhy eghnonweh nikayenthonh ji-nonweh niyutkenhonh, wahhy enjontketsko ji-nonka ne yahteyohetkenhonh:

43 Wahhy eghnonweh nikayenthonh ji-nonweh ne yaghteyutkonnyenght: ne wahhy enskaketskwaghde ne onwesenghtsera: ne wahhy eghkayenthonh ne jiyukenhheyonh; ne wahhy enskaketskwaghde ne kashatstenghserakonh:

44 Ne wahhy kayenthonh ne ji-niyonnhodenh noyeronda; ne wahhy enjoketskwaghde ne kanikonghraonweh noyeronda. Kayen wahhy ne ji-niyonnhodenh noyeronda, nokhony kayen ne kanikonghraonweh noyeronda.

45 Neony eghse niyught jikaghyadon, Ne ne thodonkwedatyerenghdonh Adonh ronwayadison ne yonnheonweh ne raodonnhets, ne oghnaken Adonh ne ronwayadisaaghdonh ne yonnheonweh kanikonra.

46 Ethosane nenne niyawenhonh yaghne detyutyerenghdonh nethoh ne kanikonghraonweh, nok ne ne ji-nityonnhodenh, (ne jiyonghwenjade,) nok neh oghnakenkeh ne na ne kanikonghrakwe-niyu,

47 Ne ne thodonkwedatyerenghdonh onghwenja wahhy jithoderakwenh, onghwenjaonweh; nok teke-nihhadont ne onkweh ne na ne Royaner karonghyakeh thoyenghdaghkwenh.

48 Ase ne na nonghwenjaonweh, eghkady ony ne ro-nonhha niyught wahhy onghwenjaonweh: nok ne kenkayen ne na ne karonghyakeghro-non, eghkady ony niyught ne ro-nonhha wahhy karonghyakeghro-non.

49 Nok ji-niyught jionkweh yonkwadonhonh onghwenjaonweh ji-nidewayadodenh, onkyonhha ony t'kakonde yenjidewahhewe ne ji-nidewayadodenh ne jitkaronghyade.

50 ¶ Nonwa ne ken-ikenh ne Ji-nikadon, dewadadekenhah, thoikenh owaronh ony o-nekwenghsa yaghna deya-weght yaondaweyade ne raoyanertserakonh ne Niyoh; yah-hony ne yuhhetkenhonh thiyaondaweyade ne yahteyohet-kenhonh.

51 Jatkaghtthoh Wakwanadonhaghse ne ji-niyudaghsegh-danyon; yaghwahhy akwekonh thayonkwendawe, nok dagh-non akwekonh dejidewadonnhadenyh.

52 Ji-niyughsnore, jideyontkaghkwirox, ne jiorihhokdaghkwenkeh kakhonrawats; (ikenh ne kakhonrawatskowah en-yurakareghre;) neony ne yakowendaonh enjontketsko yaghtaonsonhhetkenne, neony denjidewadonnhadeny.

53 Ikenh ne ken-ikenh kahhetkenghdonh yadekakonde na enjakoderighwaghrako, nokhony ne ken-ikenh ne ji-niyeyadodense ne onkwewh yadekakonde ne enjidewatste ne yaghdekenhheyonghse.

54 Ne kady ne o-nenh ken-ikenh kahhetkenghdonh t'kakonde enjakoyendane enjakoderighwaghrako, neony ne ken-ikenh onkwewh kenhheyonghse yakoyen t'kakonde enjakoyendane ne enjakoyendane ne yaghnnonwendonh thiyaonsakenhheye, ethone nentkakonde yenw derighwihhewe ethonen-yawen ne ji-niwadon ne wahhy kaghyadon, Kenhheyon wahhy wakotyadaghneghkwane aoshennyeghtserakonh.

55 O kenhheyon! ka-neh sheyennirerhohharhoghs? O jiyeyadadaryon ka-neh sashennyeghtsera?

56 Ne ne en-yaihheye jiyuderighwaneren ne na nyakonirerhohharhoghs; neony ne jiyushatstenghserayen ne karighwaneren ne na naghtyawenraghtsera.

57 Nok Dehhinonghweradonghs ne Niyoh ne jishonkwawyh ne endewadenshennyade, ne rorihhonnyh Eghjhidewayaner Yesus Keristus.

58 Ne wahhonny, kwanoronghk'wa dewadadekenhah, sewarighwaghnironhhak, sewarighwadokenhhak, toghsa sarakoh, tyutkonhhonweh ne sawenniyuhhak ne raoyudenghserakonh ne Royaner; ne aoriwa wahhy sewaderyendare ne ne ji-nenjadaderonghyakende yaghkayese thaondon ne Royanertserakonh.

CHAP. XVI.

Waghshakoghrejaron ro-nonhha ne ne ashakodiyadake-nha nedeyudonghwenjohhonh nonkwadadekenhah ne ethoh Jerusalem.

NONWA, ne ne ji-niyutyerenh ne jienwatwistaroroké aoriwa ne ne yakorighwiyughstonh, ji-niyught Jikherighwawyh ne no-nonghsadokenghdikeh ne *Galatia*-neh, shadenyawen ehho-nise nasewayer.

2 Ne ne jityudeghniseratyerenghdonh ne ji-nadekyadendadere akwah ji-niyadejonh jadeweyendonh noghwista ne jonhakeh, ji-niyught ne Niyoh jisakotshennonnyadenny, yaghkady othe-non thaonsesewaroghroxheke ne o-nenh Dentke.

3 Neony, ne o-nenh Dentke, onghkakiok ne jonhha ne t'kakonde enghrodaghsy ne sewaghyadonghsera, ro-nonhha Yenke-nhane ne yenbhadihhewe ji-nikonh desewady noghwista etho *Jerusalem*-neh.

4 Neony doka nonkenh ayuweyenstane I-ih ony akagh-dendy, t'kakonde ro-nonhha en-yakwe.

5 Nonwa eghse Yenkewe isekeh, ne ne o-nenh Enkadoh-hetste ne *Macedonia*: (asekenh t'kakonde nenne-eh eghnonka yenkadonkoghe *Macedonia*.)

6 Neony doka nonna ok yenkatkonden, ony enskatneh endewadoghseron, ne ne aondon yaaghskwayathewe ne jikat-hahhine kakiok nonka yeyutde jienkaghdendy.

7 Ikenh Yaghthaonsakwaken ne ji-niyuhhahhes; nok Enkonyadewennodaghkwe ji-nikariwes enskatneh endewe-seke, doka ne Royaner enreghre eghniyawen.

8 Nok t'kakonde Enwake-nisko ne ethoh *Ephesus* nyare yenwaderighwihhewe ne wegghniserowanenh ne ji-niwaden-nyude ne *Jews*-aka.

9 Ikenh kanhohhowanenh ondennhodonko nokhony akwah yurihhonde niihneh, nokhony kentyughkowanenh ne radighswenghse.

10 ¶ Nonwa, doka ne *Timotheus* enrawe, desewakanerak ne naondon aeseweseke yahhothe-non deyutderonghk: ikenh ne royudeghkonh ne raoyudensera ne Royaner, ji-niyught ony I-ih eghniwakyerenh shaden-yawen.

11 Toghsa onghka nonkwewh, ne akarihthonny, aokenghraden, nok daghnon rodeweyennonnyenh roweyaghsyn ji-nonka ne kayanerenghserakonh, ne naontyesen aonsarawe n'lihneh; ikenh Riyadisax enskatneh ne onkwadadekenhah.

12 Ji-niyutyerenh ne onkwadadekenhah *Apollos*, eso Deh-hiyadonghwenjonyh ne eghyaarawe isekkeh yekanonghkwe-serakwekonh: nok ji-nihho-nikonghrodenh arekho dereghre eghyaare ne nonwa; nok t'kakonde eghware ne o-nenh yen-kayerine yenhoderighwihheghse.

13 Jatyeghwadenh, eghdejadenghnirat teweghdaghkongh-tserakonh, eghnase-niyer ji-niyught nejin, sewashatstek daghnon.

14 Sewarighwakwekonh eghnen-yawen enke-ne nadadenonh.

15 ¶ Wakwennidenghden, dewadadekenhah, (sewayenderyh ne jiro-nonghsode ne *Stephanus*, ne wahhy ne tyutyerenghdonh yunenhondaonh ne *Achius*, neony eghwahhy nonkadyh yehho-nadadaghtkawenh ji-nonkadyh neghnenh-hadiyere norighwadokenghdikeh jityakoyadadokenghdy.)

16 Eghkady nonka yonsajadadaghtka yadesewayadighshon ji-niyught ne kenhenh, neony thentkakwekde ji-nikonh ne ne yonkhiye-nawase, neony ne kayudenghsera karonghyakenhonh.

17 Wakatshennonny jiwarawe ne *Stephanus*, nokhony ne *Fortunatus*, ony ne *Achius*: ne tyuriwa ne ji-nahhoden ne ji-nityudokdaonh ne isekkeh ro-nonhha wahhy sahadiyeride.

18 Ikenh ro-nonhha wahhy ase sahhonke-nikonghketsko nokhony nise sewanikonra: ne kady wahhonny aesewadondere-ne ne ne jieghnihhadiyadodenh.

17 Ne kentyughkwadokenghdiokon ne *Asia* deyctshinonghweradon. *Aquila* nok *Priscilla* yawedowanenh det-yetshinonghweradon ne Royanetsarakonh, yekakwekonh ne kentyughkwadokenghdy ne ne raodinonghsakonh yederon.

20 Akwekonh ne onkwadadekenhah yadeyetshinonghweradon. Desewadade-nonweronh yadenkanenghrokden dejadatkwanyonh orighwadokenghdikeh.

21 Ne dekanonghweronghtseriyuh ne I-ih *Paul* ne nakwah I-ih kesnonkeh.

22 Doka onghkakiok ne onkweh yaghtenhho-norongh-k'wake ne Royaner Yesus Keristus, kinyuh eghnihhoyadawenh ne *Anathema* Maran-atha, (ne ne wahhonwanadewendeghde ne ji-nadentre ne Royaner.)

23 Ne raodenrat ne Eghjhidewayaner Yesus Keristus ne aedeweseke.

24 Ne jikwanoronghk'wanonweh ne aedeweseke akwekonh ne Yesus Keristustserakoh. *Amen.* Etho-nayawen.

¶ Ne ne tyutyadonghseratyerenghdoh ji-nonka ne *Corinthians* ne roghyadon ne *Stephanas*, nok *Fortunatus*, nokhare *Achaius*, *Timotheus*.



Pilling Library

Ayer

3A

566

AYER

3A

566

